





郝文忠公陵川文集卷之一



賦

擊蛇笏賦 并引

孔公原魯孔子之裔孫也仕宋祥符間嘗以笏擊秋蛇其事其節則有臨川之誌徂徠之銘王偁之傳在其笏則歸于今張文彥遠經晚進曲學固不足贅于諸公之末然義激于中而有不能已焉者謹賦而廣之其辭曰

昔仲尼之得政也兵燹夷尸姦宄藏甲出大都杞魯宴而齊主道之端於是乎啓奈之何天不假命遽行而遽止其餘處遺烈鉞于筆而鈇于禮誅十二公之亂臣二百四

十二年之賊子壓之以大經東之以大法莫敢瀆彞倫而
擾天紀孰意其孽魄徂而不散逆靈締而不弭蟠結乎大
塊之阿囚鎖乎九原之底乃卵狼而孕戾不矜廉而厲恥
每間治而為亂輒張慝而掩媿代謝屈信閱越千祀以及
于宋化祆蛇而陸起窰宅乎廟堂馮附乎神鬼蜿蜿蜒蜒
曳曳頽頽伸腹偃脊呀口侈噬呈露怪狀愕目奪視侈大
澤之運動常山之勢愚吏蚩氓崩角蹶趾醜酒血牲匍匐
祈祀若新莽盜國而無知之民共稱符瑞狂巫顛覲踴躍
驚喜稱為神龍因緣為市若賊操竊權而嗜利之士爭為
役使妖聲異聞鼓舌轟耳喁訛唱和謹呶叫噪震一郡而

駭千里莫之敢詰亦莫之敢訛聖有賢孫釋褐于是端笏
而前山立顧指蓄銳俟發

若子房之睨秦始奮

笏而擊顙拚身地祆死于心毒搖于尾若大尉之擊朱泚
於是惑民雨解義士風靡天子是嘉用為御史司國之直
致國于理而諫中宮之廢折遼主之誚邁節特操凜乎清
霜皦乎白日雲高而山嶷是仲尼之以直道詒厥子孫俾
萬世如矢者不屈不撓拔邪樹正賞善誅惡無時而已也
則是笏也與誅卵刃脩經筆兵萊人戈叩原壤杖墮三都
鋪異時而同跡仲尼為不死矣嗚呼叔世而下蛇龍混蟄
春雷瘖而不鳴直道憤而不植已利方而為圓又枉尋而

直尺誣譎偽異態百出有蕩俗惑衆乘高而為姦若茲
穴廟之蛇有巧發毒伺中人而不可測若含沙之武者有
之笏也無之人也孰為之擊也

哀三都賦

有序

李唐亡長安洛陽遂虛梁篡而汴始建五代荐國日益殷
富逮宋受禪太祖以汴土薄易無四塞之固且非王者處
上游之勢也議遷都長安而太宗與大臣不從太祖曰今
汴所利者近漕江淮之粟耳不及百年民力殫矣至宣政
間民雖繁夥皆游食不本著仇靡相矜益之以黨禍重之
以侈政老姦擅國黠閹用事敗盟開邊而宋泉亡金源氏

都燕挾河朔之勢以雍洛汴為邊鎮既失河朔始南走汴
金亡而汴亦虛迄今二十餘年百王之制度九州之壯觀
寢以蕪替遂無了遺神州陸沉永為丘墟可哀也已於是
作哀三都賦其辭曰

維帝極之弗建致神器之顛趾德者斃而覆宗力者踣而
沉祀允銳缺而兵頓坤靈黑而土死天王之所居衆大之
所止頽野馬而蕩滅走城狐而傾圮噫吁嘻伊誰之始
乘厥權與遐哉邈矣亡國之蹤自西而東吞聲隕涕原始
要終昔明皇之臨御恃開元之駿功抑漢魏而濶視攀三
五以比隆謂天崩與地陷可宴安以無窮學霓裳於天上

養祿兒於宮中侈幾一動姦臣愚弄欲未足心禍不旋踵
割一統以幾絕釋兩河之盜種陵夷僖昭孽臣姦驕睥睨
問鼎倔彊不朝巢以饑熾溫用盜帝劫乘輿以入洛血椒
蘭而行弑剗咸陽之故基祝萬世之元氣舍洛邑而弗居
陋姬旦之王制噫嘻嗚呼兩京遂蕪中夏壯觀削于汴都
迄用定命蔑為訐謨龍蛇起陸競為鬪關閔五季如傳舍
啓二猪之永圖戢干戈以禮樂化殘暴以詩書豈期百年
弗戢顧天漢黨復銅唐闔再權壞法亂紀按本塞源旣崇
侈而肆欲復敗盟而開邊東南朝廷種兩蔓菁華石網運
太湖浪驚祖宗之澤盡華陽之宮成引金源於海上揭汴

底而一傾忘社稷之實禍慕燕雲之虛名二帝北虜一馬
南渡孽不自天勢成崩土有臣不臣假王張楚有民弗民
依國齊豫靈光巋然幸無一炬鼠竇座以飛嘯燕離梁而
不語何故新之多變竟不知其誰主粵惟金源國一再傳
舉玄菟與肅慎繩遼武而帝燕合夷夏之制度成一典而
煥然去唐宋惟一問詎元魏之敢先而乃馭失其道潛朽
其索北陸翻沙蕭牆禍作公孫于邾王遷于洛日入崦嵫
寢適冥漠駐汴宮為三所不甘卑而分弱籍二京之形勢
跨閩中與河朔雖日窘而日蹙猶天矯以磐礴俾早爲之
定鼎不遂至于墜落嗚呼噫嘻商於雲飛車說其輻火焚

其旗一債塗地三都遂隳琴哲王之偉蹟剝列聖之丕基
俘梁亡之庾信走吳滅之陸機守區中以馳矚悵掩袂而
興悲碧雲高寒何處二女安漣水有芭涇水有瀾滄不見人
慨乎其嘆漢室金莖東移淚潛茂陵玉筮暴出人間愁虹
兮貫天淒風兮射關覽冠蓋兮弗復說帝東游兮何當還
維終南之峻極與太華之孱顏壓九地之王氣鬱千里之
秦川雖人亡而事去尚虎踞以龍蟠北却坡陀伊洛交波
怒焉如擣傷如之何悲哉白馬之禍舉衣冠而一盡宵人
肆忿寧恤乎也鸞皇胡不冥飛卒莫逃於網羅望清流而
揮涕睇濁流而嘯歌水南有花水北無家荒涼國色慘淡

天葩衝風起兮飄忽蕩愁錦與驚霞湯湯乎汴蔡三徒兮
終敗倏鼎湖之龍去震長平之瓦解曠萬里為一虛疑天
地之欲壞文子文孫青城苦魂風悲白日雨泣黃昏陰磷
吐焰枯血長存官百王兮何有山萬歲兮不壽石九州兮
果窮巖玉京兮獨秀惡於中原無所歸咎李唐既遠金源
弗受熙豐一黨宣和八賊務快私忿竟亡人國言及此兮
噎吭涕無從兮橫臆草木為之不春日月為之改色小人
懷土君子懷德王澤不流下民蕩折孤猶死而首丘人豈
忘乎都邑秦人朝鮮汴人初連不見鄉園泣涕漣漣父僕
三韓子奴桑乾于嗟闊兮乃無羽翰目愁雲手異域淚老

目乎荒原慢搖神而振志忽心死而骨寒苟言還而言歸
豈安土而重遷烏兮鵲兮何枝可倚立平壠徒碑拆松摧
鄭不來矣鬼其餒而魂一夕兮九逝扣玄關而問之彼氣
數則已定何佗佗而自私夫亡有大釁興有嘉運豈九州
之神靈無一人而與問王業不偏安坤極不終傾蓋泰生
於否而亨始於困國家方尚帝德推天元飛漢唐之龍馭
貶拓拔之鴈臣閱帝王之窟宅奠天居而覆民吾何為乎
怨嗟艱辛以熱中而疾夏為萬物而憂春也易哀為樂收
泣為笑捧葵藿之朝陽返山河之夕照

渾沌硯賦

賈侯有硯端之異石也溫潤堅潔渾然天成而不鎡匠鑿
之力余嘉其能全於撲而致於用也故名之曰渾沌而賦
之辭曰

昔先天氏之一卵全渾沌於太極有心有跡而惟變是適
方其殼不音而拘龍不蛻而蟄會萬殊於一同而納萬動
於一息忽感而化與神俱入秘于重泉贅為老石而潛風
波沒泥滓漱沕瀟湛清此哆嚙驚而墳彩老蛟怒而厲齒
既未復于故步復見遇乎舟子淵九重而縊出判二氣於
太始深固反以誘盜靜密反以求徙割鰲膽而獲翠落鯨
肝而得紫一泓鑿而失真六竅存而不死然衆變之天忽

實太化之所使水無風而不波心無物而不起但不離不
隨不鑿不弭又焉有卵爲石石爲硯之異又何疑硯非石
石非卵之旨蓋必有是物以明是理必有是用以明是体
一貫而通一宅而止是渾沌硯也已故其奕輝光登侯堂
琰匣貯而色瑩淨几陳而氣張定心存而玄穎自役大樸
在而儵忽自亡散跡於墳典策勲於文章石渠東觀陵輶
秦漢孔壁汲冢頡頏夏商燼南山之松而不變腐孤竹之
管而不傷墨者自墨而不迎儒者自儒而不將舍中和而
雲滄雨露摧堅貞而金聲玉相霧縠披于沔水陰鑑溢于
秋陽色非此色而妄幻滅時非此時而寵辱亡守重厚薄

泓洋不名不毒而其用不可量也亂曰硯之珍石之詭杳
泐光含玉肥水知白守黑兮爲石谷知剛守柔兮爲水委
是以涸四海而不沉灰万山而不毀納元氣兮雲之根化
無窮兮神無已而列諸聖賢之軌固不待蒙莊浮屠駕言

而作此

時張賈二侯方事
佛老故以是調焉

銅雀臺賦

天斷漢結誕植姦孽董則顛而袁則揭曹氏猖狂銅雀魏
峯兀崑崙閉孟門嶽三臺見三山截霓斷雲縵重楹而走
六龍折角徙薨頡地頽空碧甃金鎔直外隆中壯天骨柱
天崩激千里而怒長風如此之富如此之雄而操之心猶

未克俾漢之天爲曹氏天漢之國爲曹氏國漢之民也曹氏奴漢之臣也曹氏隸漢氏之宗廟宮室燼矣而曹氏之列屋長門美矣漢之庭寡婦悲曹氏之庭嫗與妃聆義聲觀義旗孰知其非而操之心猶未涯既立海移山分辰幹斗負漢鼎而入魏宮結漢網而維魏臺則丕也拜表植也拜章權退備隱琮降表亡不愧漢霍光自比周文王四顧無人虎踞而鬼俵忘赤壁之辱誦明月之曲笑吳蜀之僻隘鄙桓文之局促乃上重臺入雙闕慨雄姿鼓高節燕歌兮玉粦塵趙舞兮風翻雪望二喬而不見怒孫劉之未滅謂我翼莫吾禦我角莫吾折彼神器入吾手孰敢撤而裂

之哉曾不知此世此年守漢宮者孤兒泣血守魏宮者姦雄倚疊也一旦懿不忠國昭不義扶濟戈投車龍悲鼎湖則銅雀之富魏宮之蓄賊規盜模一爲晉所居嗚呼天既不有漢而魏復當有天使魏有天則魏之爲魏亦昭然矣奈何魏反不務可作真帝逼君而生拱北以漢臣欺世而死征西乎噫欺人者不自見已不欺人人不欺已魏欺漢作是臺而不能居晉欺魏獲是臺而不能保臺乎臺乎果孰居乎不欺人者其永居乎

龍蟠若木山子賦 有序

龍蟠若木者禁園之奇石也德陵狩汴播棄泥壤遂用崩

折有客過而悲之因命僕以爲賦其辭曰

天蛇竒骨僵立突兀不斤不鏡而盡諸山之秀鏤造化之窟力百轉而首萃鬱龍蟠于若木茁元氣乎一拳露大初之面目潤涸四海出翻萬谷尺有千仞之峭歸無一粟之俗蓋天鍾美於足備夫三索之蘊以終萬物而始萬物不徒說於人而爲眼中之物也故其堅足以不磷重足以鎮躁止足以閑邪靜足以寡欲使爲明堂之礎而足以柱天使爲昆吾之砥而足以剗玉惜乎時也非時命也非命投閑置散於侈靡之地而爲游觀者所矚故默默以自容兀兀以自足三十六官方藝沉薰麝爭容而戰媚抹朱而縮

綠此則煙淒霧慘風呼雨沐踞長松而倚脩竹盡漢武之雄夸興秦皇之凶獨齊管絃于天籟等山丘于華屋寄春色於莓苔寓山鳥之一曲幾雷霆之震怒欲奮飛而起陸媧皇逝而不返懼不周之再觸是以陸沉而不溺朝隱而不屈巍巍乎將閱千祀振萬古而不朽不歿也豈意其山移海倒地圯天覆虎出于柙龜毀于積幹神鼎而寶康瓠逐麒麟而囿麋鹿又崩折于瓦礫復閉滯于溝瀆彼不才之石瑰珂瑩確全其天而碌碌此其將遂沉淪湫底與糞壤同化亦將有時而出也耶嗚呼一石之竒猶若是矧抱竒之士乎士已爲楚大夫之三劓而石復爲竒草公之慟

哭也宜矣

靜華君墨竹賦

君姓張氏行臺公之女元遺山之姨姪總管喬君之妻也

甚哉物色之有異也不爲丹青不爲麗縵不爲泉石不爲卉木墨於用而形於竹開太古之玄闕寫靈臺之幽獨儲秀潤於掌握貯冰霜於肺腑足乎心而無待於目備乎理而不備乎物全乎神而不徇乎俗蓋達者之有天趣而以貞節爲寓也若一葉一節施塗粉澤舒焉而布煙慘焉而綴雪以規規之形似幸他人之目悅是理惡之倣顰惡足以知吾物色之說竹有竹外之形墨有墨外之色故與可有成竹之論坡仙有心識之訣而穎濱謂解牛斲輪心手

俱滅而後至乎超絕詎庸陋固滯者得廁其列也於乎靜華琴書滿家雄侯玉胄振吐天葩幽閑貞一瑩璧無瑕棄寵光而高蹈緬逸志於雲霞湛虛室之太素曾不熹乎豪奢故其坐雲軒佇靈宇凡蹤絕天籟舉吞八九之雲夢小渭川之千畝沛蕭蕭之神寓植歲寒于毫楮掃胸中之全竹走筆下之風雨忽穎脫而迸裂怒絕繡而掣去何此君之尚玄蔑青翠而不處恍一夢於藍田幻兩身於湘浦措斧斤兮何地陋淇園之漢武揮淚涕兮何從媿蒼梧之二女發四座之清風駭半襟之煩暑欲折枝而不得懼真宰之或怒縱入橫出高森亞舞不步不武不繩不矩百千其

狀劍拔戟踞會于嘖呻而得於盼顧豈畫工之屑屑於此
焉而得與神奇忽恍固不與萬物同化將落落兮終古則
君之玩物色寓天趣又其紛紅縵綠所得同年而語哉亂
曰月府兮雲卿戲墨兮淋浪震靄靄兮神蒼筤列數幅兮
森中堂氣颯爽兮來三湘粵惟靜華之比德兮秉貞節兮
凌霜

怒雨賦

己酉五月十三日

蟾骨畢而膨脹箕後口而饒吞帝惡貪兮赫怒氣軒軒兮
不平乃命箕伯召坎師轉陰軸翻陽機鬱抑乎兩儀蘊隆
乎四維包并乎八荒充塞乎九圍括一囊而大舉疆萬里

以長吹陣雲移海而起雙霓貫斗而飛肅肅慄慄沉寥慘
戚收兩造之和氣寒凜凜兮來逼忽六合之破碎迸金光
于虛碧震來兮靄靄迅擊兮霹靂轟轉萬乘之空車墮千尋
之絕壁勁穿心而裂耳訝踵入而頂出間剝啄之聲落似
沙石而還濕忽抑絕而閉默等萬籟之喧寂驟江傾而河
沛灑天瓢爲一滴滔滔蕩蕩潏潏泱泱泱泱千里一注瞿塘峽
上急浪驚湍沕滴飛蟠從天而下底柱山間紛秦堅之百
萬避晉玄之五千怒夫差之水犀旣射潮而矢天少瑟縮
而浙瀝復誕漉以連沄蛟龍奮而不屈走陸梁以高騫蝨
蚓暗而不鳴蛙黽噎而不喧疑天地之嘉運欲覆世而一

漁罔兩驚而轉石罔象喜而跳淵溢溷中之污穢沒庭下
之蘭茝疑天地之衰運復太古之茫然稚子踣而不蘇畏
崩壤而壞垣老媪伏而不動固局束以孿拳彼腦中兮何
主宜外物之變遷羌獨台兮草堂方偃蹇而高眠為攬衣
而徐起正冠襟而待旃主之乎以忠信彼胡為乎諛偏倏
孤電之長掃賈餘勇而忽還星吐焰而耿耿月流波而娟
娟於是濔牀而下擊爇而歌之歌曰尸居兮龍見淵默兮
雷殷彼自怒而為幻我惟常而是允存而守之一心而定
推而放之四海而準又何怒之遷而喜之引也

瓊花島賦有序

歲癸丑夏經入于燕五月初吉由萬寧故宮登瓊花島猶
徉延佇臨風肆矚想見大定之治與有金百年之盛慨然
有懷乃作賦焉其辭曰

楛矢飛燕遼傾宋奔中夏壯觀萃于金源鬱天居之宏麗
開陸地之海山忽陵飛而阜走見虎踞與龍蟠建瓴水於
河朔浩不知其波瀾沉沉罩罩旋坤轉乾赤城紫府幻出
塵寰粵惟瓊花之一島突兀乎其間崑崙之巔海風怒掀
劈濤頭而迸落結水面之青蓮巖巖巖巖磐磐僵立孱顏窳如
鰲頭冠日觀而却走偃如鱸背負月窟而橫高寒其頂有廣寒殿
故瑤光樓起金碧鈎連斷霓飲海頡地頽天華陽九州之

塵

遼海百年之蘊烽湧煙填慶雲佳氣郁郁芊
 芊時屬清夷天下晏然倒淮南之戈而荆楚帖崩統萬之
 角而安西安神武不殺而日趨於平春信誓既結而無事
 乎開邊明珠白雉不召而糜至蒲梢駮耳無用而復還一
 人高拱於其上無所為而樂穆清之燕大臣優游於其下
 無所為而興禮樂之盛萬物鈞化而無閒四海被澤而不
 偏風俗既厚綱紀日完財不聚而富刑不用而措政不更
 張而治士不作聰明而賢民日遷善而不知其所以然而
 然疑疑乎魏孝文駸駸乎漢孝宣宜乎於此樂天下之樂
 軼邁往而追義軒收萬方之瑰詭盡九土之纖妍紆青雲

之環佩奏鈞天之管絃御長風於絕頂訪蓬壺之飛僊開
 八荒之壽域正一氣之陶甄躋斯民於仁壽而君臣與焉
 挈斯民於遂樂而君臣享焉涵浸醲郁上格于天舒愉粹
 暢下達于泉濟濟洋洋殆三十年見始終之全倏九龍之
 飛去墮神鼎于羽淵宗沉社債而乃屢遷雖則屢傳竟不
 能永其傳功如是德如是不克負荷一舉而棄捐孰為之
 司而使之然涸金源於汴蔡卧一島於蒼煙悲風射闕謂
 也居庸枯石荒殘瓊花樹死太液池乾游子目之而興嘆故老
 思之而淚潸蓋餘息遺烈膏于骨髓著于肺肝雖死而若
 生雖亡而若存有與析津同沛箕尾共騫者雖曰假山而

實德山也彼虐政虐世昏君暴主以萬人之力肆一己之
欲刺吾乾坤穢吾山川雖曰石山而實血山民欲與之俱
亡卒聚而殲旃寧不愧於茲焉

泰山賦

粵大荒之播氣肇天一而為水滓沉澄而濁凝柔洞蕩而
剛峙故水載乎地地載乎山抵艮茁震冠海而起為萬物
之始終藏八索之首尾堪輿之骨壯貞宰之形似人皇九
頭俶載于祀禹鑿益焚神力是試條而為三別而為九祀
而為四中維岱宗獨尊而雄盤踞萬古莫與比隆衡因阜
麗瘴海極熾融飈赫赫物燬其銳華固秀拔金天肅殺一

翠橫秋萬化拳握恒亦宏富天地闔戶玄都幽府固陰寒
洹粵惟茲山首出庶嶽其頂則呀突乾維其足則亘拊坤
絡奄東國之全勢孕日出之鴻燭作帝孫而奕大混天胎
而不鑿為有生之司命權天地之橐籥露太初之面目愠
巨靈之猳惡鰲六眷而矯首龍七襄而奮角障大海使不
流俾降丘以東作拒洪河之奔湍俾回翔而北却三州得
以完厚萬民得以土著瞰臨翼魏軒輕恒趙背左燕遼夾
右瀛鄴劈青徐之疆眈包兗豫之封略壓吳頭而益重捍
楚尾而欲割拉琅邪而橫鶩控龜蒙而回躍淪濟漯以為
襟帶汶沂以為約渚大需於雷夏洩厓澤於邾濶秦觀可

以窺長安周觀可以窺汴洛合沓九州之半覆壓數千餘里重覺魯疆不為齊弱豈無他山高蹈磊落劔門則擅其重閉樓石則肆其超卓天台則鬱其詭譎太行則亘其磅礴各據地勢偃蹇岵岵如草昧之崛起據偏方而驕跋恃區區之險固徼制外之封爵孰如茲山中華正朔建極啓元衣冠禮樂天宇夷而皞皞王道裕而綽綽豈無群山紛紜交錯或繚徑之蛇結或垂巖之鷲啄或刀巖之梯疊或斷壁之牙過或青蓮之天開或蒼屏之玉削如夸徒與宵民極其力而相較空氣鼓其餘勇冶容盛其塗抹孰如茲山袞冕散珽朱紘疏越純粹中正崇高溥博大哉乎聯延

九重鬱如深宮歸其中峯見天子之雍容前列如却後列如剝拱捧旋躩見百工之致恪云云亭亭衆星北辰石閭社首百鷲一鷲既塗湧而豐隆復曠豁而綿邈扶青帝之宮觀締玄臺之樓閣瀛州邃其幽深蓬壺敞其寥廓飛僊飄兮遨遊抱明月而遂樂采玉芝之芳潤探先天之希濶御絕頂之長風眇天地於日末閱扶桑之蘭麝幻魚龍之軫轄卯長鯨於雲根巢陽鳥於日脚蒼笈分其齊色鏤紅金于碧落羲和起其龍馭駭萬國以開覺者貺蓄而奕奕昭靈貯而灼灼豈徒云乎高大乃與世而落莫豈呈竒而露異等尋常之富壑哉若夫觸石而雲膚寸而合崇朝一

雨曠旱弭虐卷舒陰陽杳不可度有如是之神儲膏溢澤
蒸為桑土衣被天下民無寒苦播為陽春孤續天宇發育
萬物白芒彙庶信屈起伏如嫗如煦有如是之仁既高而
大又神而仁乃於嶽麓篤生聖人續大皞之統萃奎壁之
貞木極再造四時復春蘊而為道發而為文膏澤其民堯
舜其君德與山高名與山尊六經垂天與不死者存則又
與夫育蘭茝圃松椿出器車生皇麟羨金錫之利蘊珠璧
之珍者不既大矣乎宜乎唐虞盛典周漢極制巍巍堂堂
殷秩緜事後王後帝崇德報施繼繼承承垂于萬世

虎文龍馬賦有序

乾陽萃精星列房駟健之至也故飛而在天則為龍行而
在地則為馬雖八卦皆擬其象而獨專於乾坤負圖而出
于河包犧氏按之為畫聖人事業以之張本而文籍生焉
則又用之至也出於乾陽故產于西北陰國金天往往驕
蹋羣龍馭駿特異號稱龍種其蕃息盛大皆莫若國朝沙
漠廣莫地經兩海盡為游牧之所又兼金源四十萬并西
域三十國古之所謂千里者海飲川量婦人豎子皆乘御
之搜竒拔異始得與御苑下乘
今上所御虎文龍者空西北百千萬羣而未之有伯樂之
所未見書傳之所不載古今之所罕聞又虎變炳然有定

武功彰文德之象馬昔漢武帝得之外國而親為之歌唐
太宗之所御則圖書凌煙閣而為之贊矧今生于本國又
若是之異乎歌頌不作則與駑駘等為無聞敢犯齒路馬
之罪而獻賦曰

天柱折地維絕東南傾西北揭隱日星為晝夜結陰陽為
冰雪死土銜沙枯山積鐵白草失春黃榆不葉洞瀕幾萬
餘里蹠踏幾千萬年蘊天馬之剛健混神龍之窟穴不知
其幾萬餘羣幾千萬匹相我薄伐控弦立國不稜豆而秣
粟不棗脯而齧膝盡風呵而雨止恣原阜而野壘從橫敢
慢擾游閑適全其所天故皆越逸一兵控百百不介一力

有餘裕故皆蕃息瀾翻浪動川盈谷溢奮威靈以一戰獵
諸國而無敵迄今四十有餘年矣我

君中興真龍間生一氣直壯四星曜靈駭西域驚北庭飛
黑水晦青冥碎崑崙轟雷霆煙雲墮地列缺生寧振長風
而一嘶凡馬喑而不鳴六丁眙矐而弗執貞宰辟易而弗
乘於是飲余吾濯渥洼褪鱗介脫角牙食萬馬而類駭化
一龍而若駟質金火而黑章黎剪刀而互呀變乾坤之至
文散玄黃以為花會運數以呈用來馴服于

帝家頭骨隱戟面頰夾壁豎日日出陽鑑電激膺門肉閣
汗溝血滴垂梢絲齊分鬣髮直霞筋藏骨玉蹄鐵脊前鳳

後兔宛轉却顧飛燕掠地輕不著土奔軼滅沒掣去縱步
東西有日天地無路倏忽變化匪龍匪虎逍遙良善遇知
得主帝軒之飛黃后唐之赤文周王之駮駟漢武之天驥
魏文之澤馬殆皆不得同年而語矣於是

帝亦惠異登進上廐一品芻秣萬乘之右鉸玦宝錯鞍勒
珍鏤金韉玉鞭服習馳驟建旆西出足力騫張渴飲洱水
怒蹴點蒼萬里一息建業興王吸絕江流瞰視武昌朝楚
暮燕載會衣裳新官法駕金蓮正香飛龍在天遂卻走馬
和鑿雍雍垂拱而治天下視彼夸毗盤于遊畋放心事侈
贖武求仙奔貳師走嫖姚志欲無已焉則又天淵之懸也

亂曰嗟異馬兮遇主知虎為龍兮風雲期奮靈虬兮躍神
螭隘萬里兮強一馳乾坤小兮日月低適時乘兮加馬羈
效倜儻兮呈權竒宣皇靈兮耀主威朝江南兮暮遼西功
德盛兮天人歸飾玉輅兮開金扉馬在廐兮方無為

冠軍樓賦

有序

中統元年庚申夏六月奉命使宋道出宿州濼路霖雨蒸
厲作惡遂為稽留時東平嚴侯之弟開府于是日置燕
于冠軍樓在城北隅西望平遠盡得東南之勝乃為賦之
其辭曰

庚伏苦雨沴氣中人壞垣毀屋沒馬滑輪蒸颯鬱攸卷局

不伸子乃斷羈思振氛翳藏天倪肆棲倚將超超乎邁往
而沛沛乎凌厲爲引領而延佇快遐覲而馳睨玉臺公子
金羈列侯立馬却坐起予勝遊越黃泥之坂而登冠軍之
樓清風條條火雲四收別入一天曠如三秋闊步高視覺
九州之外復有九州欲中天而上征削塵蔓與隱憂頓汗
漫以爲友蕭逍遙以爲儔旁薄乎希闊徜徉乎燕休旣而
觴豆粲列吹歌疊發涼入翠綃怨生瑤瑟邊聲跌宕壯氣
激烈卷山河於霞腴駐風雲於玉節目與天遠萬象入矚
夾右齊魯面左楚越海岱連絡遡東北而去淮甸平遠轉
東南而圻聯陂塘而際野溷青山於一抹屹震南之相望

巖鰲頭而岌業千麾霜橫萬壘星列皇輿鞏固藩墻不決
隱若長城淮海有截惟威惠之並舉俾姦宄則遯跡雖平
衍之一區固形勢如四塞伊將臣之司邊不在于地而在
于人不在于兵而在于德所以爲冠軍也玉盤醞醑遽一
再行吳歛楚謠激爲新聲淋漓參錯飲驥澆鯨酒酣氣張
心翼馮馮慨嘆今昔反有累乎高情顧瞻彭城隱隱垓下
想見高帝之嫚罵項羽之叱吒騰擲宇宙而競爲凌跨白
骨蔽野魚龍戰罷孰得孰失皆爲解瓦一時偶然莫驚王
霸睢水復爲之流而怒魄邈然而化還望維揚壞堤地地
土蛇一眷千有餘里負汴水而依淮猶縶首而曳尾遺長

雲與老樹見窮奢而極侈藐瓊花於天風弔荒淫之帝子
凡以欲而從人乃保宗而延祀將以位而為憂固兢兢而
不恣詎可從耳目之欲血生人而肆一己哉其債社沈族
身被其戮為萬世笑且矣登高而賦樂極生悲擾擾紛紛
將安所之納萬變於一息復駕馬而還歸月在踈桐步玉
馳嘯書而為賦以寓遐眺

瓊花賦有序

中統二年春三月制使李公致瓊花數枝是年冬十月而
夢二客相邀至維揚之后土祠飲于花下嘯歌為樂既醉
而覺乃作賦焉辭曰

江風吹雲枕壓霜月神不棲目軼思超越栩栩曳曳境與
世別天宇闢凡蹤絕歷蘭路開桂闕飄飄乎馮高御空不
知身之幾何而造乎虛白已而扶搖頡頏恍惚莫量疑在
鈞天亦如巫陽孤鶴飛來縞衣玄裳翩然負予背風翱翔
下視淮海雉堞相望具錯珠瑩接屋連牆繡簾瑀擁綺䟽
綠房十里一市金紗煌煌混灝海之魚龍駭飛埃而陸梁
忽丹霄之二仙翥青鳥以相將指仙花以為言可嚼月而
飛觴是閨苑之仙根來瑞世而呈芳坵膩雪以搖碧刻春
冰而帶黃噴藥蝶於花心引輕絲而不狂天風收其落英
不委地而飄揚彼衆卉則俗死漫紅扶而綠媚玉陰娑娑

從倚徜徉清香忽來莫知其方乃誦明月之曲歌窈窕之
章倚歌橫簫鏘鳳鳴皇挹芳瀾之浩渺傾墜露之淋浪卷
瓊瑤於玉盤吸霜露於肺腸欲折枝而不敢懼貞宰之或
傷且對花而舉酒澆遯世之茫茫倏焉玉女隔花而語髣
髴花神是爲花主責自瑤華以臨后土剪冰綃以爲裳染
麝塵於金縷拂白霓而下征曳秋霞而輕舉現仙姿於塵
寰寓風神於月府且曰有妹其字飛瓊適來瑤池善爲新
聲與君佐酒以薦予誠遽作穿雲振搖瓊英說仙家之幽
杳詠蓬壺與赤城閱花朝以逍遙駐芳姿以輕盈嗟胡爲
乎斯世而沉寘于此生也時予既醉二仙亦去花落尊空

歌殘玉樹斗轉參橫脫兔驚寤餘香冉冉月滿窻戶乃爲
記夢之歌歌曰玉宇春兮花始開與二仙兮飄然而來花
亦喜兮搖手瓊瑰掇飛英兮泛酒盃飛仙爲我兮歌以
纍纍亦既醉兮胡不歸花滿袖兮香滿幃謂予是夢兮予
不疑嗟時之人兮孰非夢之爲

秋風賦

有序

又在舍館偶因秋風之起一時介佐三節人負皆爲感愴
故作是賦以激釋云

駐星麾於江滸歲月會于作噩漲老天之黃南鬱餘蒸而
欲灼忽焉西南天露雲駭械械栗栗慘慘邈邈抵罅吹隙

涼冷遽作始則叱號突厲撲蟻抑蚋漸乃蕭瑟披離衝牖
動幕散宿濕于雲梢眇新聲于木末觸餘感而興懷倍陰
森而索寞既乃一時介佐塌馬而噓撫驛搏膺掩面向隅
以爲行如返如執如棄如相與愴怛怨艾咎躬責己天實
斲余行使尼止方變故之無窮則憂思其曷已或當饋而
三嘆或中夜而九徙歌缺壺而寓哀痛撫牀而裂皆金石
化而色變骨肉悲而心死余乃紆徐而告之曰士不以一
失自沮一得自喜金百鍊而方精節萬折而逾厲持此心
之亢矯奚外變之軒輊今則暑勇退涼風至困疾蘇淹抑
肆我雖連蹇宋猶有禮撫問仍存德音在耳當凌厲清氛

趨然而喜排去鬱攸攝衣躡履灑然濯熱冷然淬志快側
佇於雲霄期翱翔於帝里乘此風以成行俾照耀於萬世
何乃作楚囚對泣竟不爲魯連毛遂而漫爲宋玉之悲耶
子以秋風爲悲余獨以秋風爲樂夫以秋風爲悲者非獨
子也常情皆然門巷蕭條良人遠征傷心砧杵掩淚邊城
庭樹脩脩鴉啼柳斷帷薄生寒夢長人遠此怨婦之以爲
悲者也弱水雲沉交河日落風急霜清重城擊柝令重身
輕黃雲畫角十年不代有書無衣吞聲飲泣又下邊陲此
戍役之以爲悲者也塞北游子江東賈客去國暮年音塵
杳絕行露沾衣風吹曉月草根蛩吟喚愁啼血四顧無人

氣填心折此羈旅之以爲悲者也囊中金盡淚滿貂裘從
橫不就報主懷雉葉落尊空心事悠悠知己不見天高鴈
沉彈缺風悲長歌短吟白草荒山塵埃滿襟此不遇之以
爲悲者也菽粟青黃草肥弓勁瀚海波翻鐵山塵巨肉飽
顏醜控絃馳競一噴生風長林葉下陳合鞭鳴駝騰萬馬
破屋殘城崩沙解瓦此遺黎之以爲悲者也今則
仁聖御世霈德施惠下輪臺之詔發輸平之使二鄙不聳
嗇人和會麻麥幪幪黍稷穰穰室無怨曠之婦塗無稽滯
之旅朝無不遇之歎戍無屯謫之苦抄騎不出烽燧不舉
同世情之所悲亦將以爲樂也子何以所樂者重爲悲乎

於是介佐相與言曰吾等之昧固如所云吾子之樂可得
而聞曰可哉麗金行秋赫輪不鏢大火西流音冷不作有
風颯然云胡不樂若夫洞庭波木葉脫陂潦盡山雲薄快
萬里以長吹卷餘苴與纖惡汎六合以澄清展青空而高
閣淨蒹葭之洲渚開芙蓉之城郭留夕照于飛樓挂殘虹
於高閣水落而江淨天澄林疎而煙橫霞抹天痕虛而見
歸鴻露華涼而聽鳴鶴金莖突兀霜仗光寒銀字聲淒翠
綃香着泛新商於瑤瑟曼清音於珠箔際邁爽以昭曠莫
不凌兢而曲躍是其所以清也紛拂於青蘋之上夷猶於
銀漢之間激怒於土囊之口弄響於松篁之前散鷲鷲於

洪濤發鏗輞於狂瀾挺生金於曲岫振鳴玉於空山虎嘯
而萬竅裂龍吟而九淵翻是其所所以雄也至於蜚霜激沙
撇揆秋草白鷹蒼隼金眸玉爪飄飄搏擊氣勁心老沙場
欲雪代漠生雲驂駟紫燕渥洼龍文輕風入足赭沫追奔
朝飲溟渤夕踏崑崙尾閭潮回天池浪激鯨鬣搯山鵬背
闕日乘化起運扶搖發迹超逸絕塵杳不可及是皆憑威
靈而神變化瑰竒壯浪有不可紀極者余於是時則將掇
蘭塞蕙濯纓結佩翥非煙之冉冉御靈颯之沛沛相羊逍
遙游於萬物之表鶻於八極之外聽萬籟之秋聲轉一元
之和氣舒而為春融而為薰隲仁壽於吾民厝治安於吾

君是余所以樂也子其東載秣馬易悲為樂鴻毛垂翅乘
此以飛揚巨魚濡沫快一縱于林壑也仍作歌以訊之曰
茂陵劉郎去不歸秋風起兮白雲飛余欲翔于帝鄉兮蹇
予行兮江之涓南山有萸兮北山有薇月縞縞兮風淒淒
有美人兮天之涯塞桂子兮今其時執子之佩兮擊子之
衣兮與子歸兮從風之吹兮子毋以為悲兮

牡丹菊賦有序

初入新館客將宋日新致朱砂紅牡丹菊一本祇三四花
慘悴萎暗不以為竒遂植之穿廊西之隙地今歲忽茂連
成叢高六七尺及秋而放數百花所未見也適正甫書狀

生朝而其花尤盛故作賦以寓感其辭曰
西風悄兮幽局木葉下兮空庭忽異卉之呈芳乃示予以
不情郁霞腹之春姿敷玉瀼之秋英蹙絳綃于青苞翦翠
羅于綠蓬拆細桃與紫微訝鞞紅與鶴翎高層層以奕奕
重裊裊以盈盈結膩黃以為心抹沉粉而含馨凝夜氣以
夸晝姹斜陽而輝晴仍牡丹之花王疆將菊以為名嗚呼
噫嘻時哉匪時造化則奪形色不移雖反常而似妖顧真
宰豈予欺寓國色於羈孤謝凡品之芬菲挾金氣於西陸
吐霜葩於東籬鄙傾城之鄭袖期佩蘭之湘纍獨超出於
群倫不擊累於等夷特以秋而為春乃奇花之出奇彼自

為一時殆非後時也且持盃而浥露更嚼句以待月儘吳
江之飛霜其窮海之號食雪與後凋之姚魏共終全于晚節

幽翹賦有序

上即位之元年詔經更成于宋宋人逆之入置于儀真姦
宄漏國相與構陷誣為欵兵不受書命且偽報異聞者再
遂不令進退自庚申至于甲子凡五年冬十有一月宋人
乃報其國喪而復無縱釋之命幽抑無紀極而莫適赴翹
作幽翹賦以自釋辭曰

天明監覲弗蔽兮奠表著以誠陳各蹈道以執則兮于坦
夷兮是循惟札與信為通達兮俾行李以問津顧率履之

弗越兮何虎尾之噬人棘于裳而杞于車兮音蟪屈而莫
信滑溟滓以造艱兮胡構台以愆辰習坎而入于坎窞兮
遂蒙鼻乎穹旻塊百折而償于下兮墜沉坳而無極荐局
側于管井兮重覆盆而擠石鬱憤默而屯惛兮觸黜然其
若添踏泥塗以墊隘兮薄湫壤而淫濕頓濡滯而壅底兮
疾重脰以侵賊混河魚與谷鮒兮麥麴窮兮焉所得顛連
而無扳援兮仰千仞兮無涯涘責躬而反己兮抑不知其
所自粵台宗之權輿兮兆玄鳥以降殷託帝乙之支屬兮
分方枘于太原蟬聯而曼延兮委落族而紛綸羌台弱植
之熒特兮乃繼序乎其季振迅而自亢兮欲託始以立世

襲皇風之氤氳兮紉幽蘭以爲繫冠章甫之魏峩兮錯瓊
瑰以爲佩握火齊于天衢兮挽扶桑以載燧造高朗以正
大兮灼群昧而用晦攄混沌之滓穢兮萃元精之純粹衣
堯兮服舜仁爲旗兮義爲軌堅窮而石守兮望道圓而日
進絕蹤兮追鹿弗以爲遠也探神區而挹道真軼乎無極
之近也渴日而不得留兮乃以夜而爲晝葺江籬以爲裳
兮搴芙蓉以爲袖扈辟芷以揆芳兮濯爛錦而編繡步驟
駮于康莊兮翥鴻鵠于雲霄越希有而出大荒兮乃度負
而絕遼汎洙泗以揚波兮扇之乎以清飈掇蕙萑而杯灑
露兮灑旭日而晞蘭茗遘靈脩之際嘉兮下兮旌以爲招

謂黎元之無告兮，父遇毒于荼苦，方焦糜于鼎鑊，又薦之于刀俎，俾顛連之赤子兮，化白骨而撐拄，血肉膏于原野兮，腐棲首而橫宿莽，閔貙兕而拏虵虺兮，醫三光而汚九土，朕盡焉其傷心兮，豈為民之父母，汝其為吾蓋，臣兮敷余孚于吳楚，轉一氣為陽春兮，暴疋魍為靈雨，包載于戈兮，朕亦願為好生之主，越拜手稽首兮，迓續民命，則在乎茲舉，昇龍節而錫虎符兮，繚霞旌而凜霜仗，遺黎若崩厥角兮，將慰乎雲霓之望，引餘息而煦之以天吹兮，鼓太和之泱泱，變時雍而底定兮，鰥孤廢疾者而有養，攀三五以反旆兮，輅成康而掉鞅，姦宄遽為之闕塞兮，惜不知其

故也，方血人于齒牙兮，盜憎主人而惡也，要余御而不使之行兮，斷予轡于路也，衆梟不識夫鸞皇兮，謂予日之暮也，嗥噪而各為兇聲兮，乃遷台以怒也，懷照乘與夜光兮，適閭擲而召疑，謂魚目與瓦礫兮，乃翻誠以為欺，棄神鼎與和氏兮，以康瓠珉珠而為奇，如射工之伺人兮，故巧發其陰機，弗為社稷之遠猷兮，姑詭遇于一時好逆而冠來兮，則予焉所知，會衣裳而衷甲兮，執魯連為鍾儀，荐棘而重圍兮，隔天日兮，江之濁溯洄而迤以澶兮，設羅畢而為之縻，銅陰谷而高且深兮，入而不使之去也，為嚇逼之千端兮，覲予改于步也，奈予心之不移兮，屹乎不周之柱也。

倏歲月之屢遷兮春與秋其代謝交一臂而閱之兮身乃
爲之傳舍方氣數之締兌兮予曷能與之爭天定亦能勝
人兮而僞烏能易余之誠戴片天以兀處兮而豈能拘余
之心欲天飛而道游兮曾不知予身之陸沉冥搜而坐馳
兮迅祥飈而邁往激九萬之扶搖兮歛上征而遐想將蹇
瑤芝于玄臺兮愬于帝而稱罔虎豹乃守天門兮列魑魅
與魍魎犬說說而吠人兮闔帝閭而弗敬仰天而呼兮孰
讎吾民而若是之阻脩台聖非姬昌與玄王兮曷爲亦在
夫夏臺羑里之幽豺虎縱橫兮麟獲而爲囚鱸鯢拉其鬚
鬣兮乃突梯乎屋簷王鴟暗而不鳴兮蜩鳩肆其啁啾維

芳蓀于資菘兮竟不別夫薰猶日方中而見沫與斗兮蹇
予之行孰爲此謀挾李順與荀純兮王驩入室而操矛漏
國而倒制兮委而莫予問也呼天而與言兮撫子膺而
自恨也蹇子業已如是兮第不忘乎民翩然還歸顧自
視兮面四壁而無聞余節弊而增塵兮眇隻影而無倫漫
勞心而惓惓兮輒申旦而弗寐載命龜而虔卜兮復端策
而訊筮吉弗食而數竒兮再三瀆而莫契鬼神亦台違兮
予焉得而謂于帝登天而不可兮乃益入于地悠悠靡所
薄兮曾不知其爲計望燕雲而不見兮聽哀鴻之嗷嗷靈
脩不可以有爲兮遽遠遠而鬱陶懷歎而孰爲矢兮屹魏

闕而夢勞緊眇末有以召是兮祇怨艾而自責必操存之
頗僻兮有菟惡與隱匿無乃不能制欲兮勝于理而不德
亦其饗功而冒進兮任乎重而弗克則亦遂非而崇侈兮
不能執中而過以不及或昧夫幾而闇以顛兮窒于物而
疆以塞孝不能盡親兮忠不能盡于君信不能及友兮誠
不能格夫人是用底于壘跋兮則皆自夫子身內咎而不
敢誰尤兮中隱畏而酸辛第予之所奉行兮礼人而篤夫
動也縱或有以自取兮何為至此極也戢兵兮止殺則吾
君之仁也輸乎兮繼好非有惡于渠也止予兮將焉求則
亦荏禍于渠也前脩與已事兮可以鏡視而新是圖親仁

兮善鄰乃為國之訏謨合則所以福吾民兮阻則為咎之
徒繫天誘吾衷兮吾民之禍庶有豸行人竟何辜兮乃鬻
羈而反害夫澶淵與靖康兮于得失之跡則固在和安而
戰危兮前轍宜以為戒謂江南之文物兮可以繼夫三代
釋子卿而俾之歸兮乃曾不如匈奴闕太和而徼倖兮反
信用乎矯誣誤國而不自知兮曾漢唐之不如嗟台身之
在天地兮眇太倉之一粒吾

君之命不辱兮死生不足為得失和龍之赤氣兮釁固有
所積也自昔怙私而召亂兮從顛隕而弗恤也蹇台焉所
望兮乃援溺而入于羽淵時不可以驟合兮竟却走而不

前苟非台之所召兮則壞運其自天顧台所懷之貞珉兮
猶未至於玷缺故佩之杜蘅兮有芳荃以爲結楨中庭之
霜華兮飾之乎吾之節擎江雲而綴天星兮噫孤風而抱
明月吸素霓與清氛兮雖閤室而益白絜已而莫予污兮
挺節而莫予折截玉而斷鐵兮冽冰而凜雪不欺天而負
君兮庶無愧乎前哲從野馬與塵埃兮溷狐兔而蹠血已
地坵而天傾兮猶不懇予之說在我者亦既盡兮安得復
爲之喋喋亂曰與其惡蒙以求明兮曷若靜固以養正兮
與其行險以徼利兮曷若安時而委命兮世固不余知兮
謹獨聖之令也幽所以益吾之修兮屋漏則致予之敬也

非予殄天民之澤兮殃民者固爲之寤也

郝文忠公陵川文集卷之一

郝文忠公文集卷之二

古詩

寓興

弄丸觀古初洞見天地心不外人與物坦白無幽深如何
妄意者肺腑戈矛森亂鑿渾沌竅遂使天機沉世失鍾氏
子孰與傳希音欲言復無言感動為長吟

靈源洞無極混混春泉瀉流為川上波晝夜遊不舍榮枯
逝乘除寒暑相代謝化機一闔闢圓方自陶冶君子惟乾
乾惕夕懼以籍勿謂吾道亡中有不亡者
思慮即鬼神所發不可妄人物或可欺鬼神其可誑山川

鬱其傍日月烜乎上化幾速影響昭晰示情狀屋漏謹操
存頃刻不可放重華尚兢業吾儕可浮蕩孳孳持此心斃
已無他望

衆變成大化揔萃入神紐渾淪包無外開闔紛參蹂伊人
具斯理往往昧所究湮沉血氣中頓躓牛馬後哀哉何不
淑自棄其凡陋孰能與消拂俾見高明囿

世運何無涯質文繫所尚弊政與先務取舍定興喪嗚呼
周轍東王室歌板蕩虛文不知革實禍國相望區區八百
祀猥處諸侯上

落日下西極仲尼悲死麟王澤久已熄煽火焦斯人中原

一戰場戈甲埋驚塵驅車屢途窮處處傷問津歸來續韋
編理窟搜鬼神百流收一源炳烺光日新六經垂天地一
視萬世仁

綿綿河畔柳婉婉成盤匝素絲玄復黃織組爲裳衣迢遙
門外路客子各所之並行不相悖並成不相夷如何墨翟
氏慟哭爲傷悲

聖人無常師師襄又郊子無入不自得豈惟柱下史夸徒
以藉口妄誕爲評些當時五千言洞達窮妙理大出六合
外遠探無極始後人弗克承削繩復破軌流漫源以湮校
披根以死借問蓬壺仙吾道誠爾爾

明堂一牘書制作本至道折衷六代典密理參玄造煥乎
其為文表表垂世教豈惟得時制萬世是則效新莽何為
者剽竊資篡盜大典即委地生民弊殘暴至治何由興有
淚滔蒼昊

潛觀聖人用乃在筆削書矯矯百王法挺挺森天誅立義
本忠恕淳風還唐虞後王政苟且舍此由他途僭逆尋干
戈血肉汙皇居遂世不復古永永沉真儒

鹿門有高躅彭澤歸去來劉伶醉不知痛飲銜深盃何如
王夫子教育經濟才河汾大澤流唐運實此開彼伊皆李
世此獨何為哉

坎坎咸秦坑下有六經燼後天百代跡泯泯同一盡厲階
仲尼沒諸子各啓豐短長互相擊世主孰取信異端實禍
因莫將獨罪秦

中原二十世迥無一漢祖關中無一民沛下無尺土寬仁
代暴虐麟鳳消豺虎所欠惟學術不得同湯武擾擾草竊
盜紛紛孺兒女局促無遠略倔强何足數獨有唐文皇僅
得為英主

漢鼎既已墜海內必有歸誠能正德業亦足為王基何必
由禪讓以為篡弒資鬼操勿謂鬼百戰得偷兒征西題墓
隧永世將誰欺

太康晉一統中國威幾振天子無遠略宰貳爭欺徇清高
機務廢曠達廉節盡往往矜豪奢珠璧家充牣構成骨肉
禍結起邊夷釁自此中國亡罪莫加石晉

天王不巡狩高居事遊燕侈心自茲啓歆歷寰海遍陋矣
逢惡儒拜疏請封禪名數聖無徵事與不經見萬乘壓川
谷供具窮寓縣鏤玉以銘德千古示誇衒豈知蘊藻菜足
作王公薦茂陵林著書請讀史鮑傳

周謗尚赤舄孔尼猶絃歌大節窮乃見首陽高峩峩白刃
義可蹈之死矢靡它子雲漢巨擘問學崇立軻投閣遽墮
獲劇秦真媿阿玄文與法言辨口徒增多與器不與節天

命其如何

道入王霸雜氣逐山河分有才或不德有武或無文小智
私已甚竊位徒自尊患失以持祿往往植禍根

采采商山芝麇麇秦庭鹿商山白雲深不見秦庭骨乾坤
百戰場松下纔終局笑殺子房公幾被高皇戮

伊尹五就湯嚴陵不臣漢所履元不殊心跡孰與辨濟時
與全節亦各適所願紛紛夸毗子利歆迷生死黃塵事走
趨青山爲仕途

昊天有至文倬彼雲漢章秋風波洞庭漪瀾肆汪洋嗟哉
破觚士徇辭剗肝腸執柯以伐柯元氣爲凋傷千金享弊

帝魚目誇夜光道喪實昧昧浮偽方翱翔孰為據其華立
聖追義皇

昂昂兩飛鳥不知何許來結巢黃金殿弄語登瑤臺吾民
競奔走恍惚為驚猜或為魯鷄鷄拜祀祈矜哀或為長沙
鵬與世生殃災歲久如翼繁百千為朋儕山水割膏腹構
宇凌天街遂令周孔徒凍餒纏霜埃

天容恒青青日月自昏曉此心本澄淨萬事空紛擾日月
不變天萬事不變心洞觀天人際一理神幾深

草木變榮瘁松柏獨也正一色貫四時閱世還無竟咄嗟
樵蘇子仰視驚眙矐雖云梁棟姿不免斤斧橫顏夭跖乃

年匪道實維命非為桎梏死亦非寒餒病脩身以事天終
自為賢聖

西山有佳色東溟浩淵波區宇仍崢嶸雷風相盪磨借問
先天公吾道其如何麟鳳久不來西伯安在哉

俯仰天地間吾身眇何許百年交一臂竟自為黃土灌以
仁義波植之天人圍握蘭當靈風清芬遍寰宇可與無極
翁乘化遊千古

秋風吹幽蘭明月照寒江夏然一長嘯遺響纏飛霜有味
非尊鱸齒頰流水漿遠駕中和車高遊一氣傍濂溪訪達
叟深探先天囊

有飲不滿盃有蓄不盈握床頭一卷書即是平生樂落日
從昧沒浮雲盡輕薄且濯冠纓塵不爽崆峒約

碧海驚蕩瀉中無安穴鱗風濤浩無際我來方問津飛流
霑衣裳顧眄潛悲辛扶桑繁孤槎不見同舟人浩歌登日
觀喚起雲中君

玄臺上凌虛中有帝子室縱橫羅萬家曠蕩含虛瑤我有
今借契竭來為扣擊無聲亦無臭默默還寂寂時有清風
來颯爽吹江石漠然竟無應真似無知識

瞬目一晝夜寤寐一死生為善尚不及作惡竟何成仲尼
幸知過顏子不復行君看貫盈者果莫逃天刑

皇天分四時庶類能蕃殖聖人定四經萬世扶人極率經
以事天非聖即為賢人事乃天道大經即天言下學上達
理捷徑餘無先

骯髒一丈夫鼓掌下崆峒嵩高看山色杳杳乘長風悴然
兩頰春不語指西東偶來洛下居舉世忻相從三年忽成
市遂為天地中世人竟不識耳目如朦聾問之皇極君乃
是無名公

朱弦寂無聲大羨淡無味其中還有物磊磊軒天地毫末
晉楚富眇小王公勢益賁弱其勇離朱暗其智卷舒穹壤
間與化同無際

吾道古有統軻死迷其傳昌黎功甚勤突冗排金僊奎宮
吾星會麗天光群賢太極出面目伊洛開淵泉吾道本吾
心心在道即全但使心不昧吾道長昭然

北風

北風胡為來掣手箭飛沙石無乃化樞逆鼎負塵昏塞萬竅
怒一吼土口哆一吸憤叱一氣轉大呼天地窄掃平長城
隍卷起黑山磧野馬突空走舊雪來塞北曠宇驚崢嶸六
合危岌岌中原一囊土再逐混沌闢謁薄扶搖黃盡勢
轉黑堪輿亦不守慘怛歸岑寂卉木盡搖落鳥獸皆竄跡
斷鴻撲雲去下有退飛鷁神鰲敵兩目大鵬摧六翮有物

入驅除迅鋒誰與敵惟餘冀北駒驍騰數萬疋乘此振威
靈踏碎夷夏國吾民一孔僂孳手重局脊住時雖不寒口
箝復股栗矧此烈烈威露頂裸以赤破屋簾不閉土挫纔
半席鶻懸肘不捨壞褐纔過膝妻跽子亦仆並日無一食
抱臂走道路無奈征賦急肌裂冰刀割肉死霜矢射骨槁
痺不仁氣竭凜不植心飛靡所薄指直不能屈十室一無
在道左骸岸積箕伯方震怒橫空賈餘力乾坤氣不平更
欲吹海立時余亟奔走歆入蜩殼夕暝排竟不前佇足猶
畏偏池冰勁作聲地底生霹靂雲飛月縮艷日落天失色
斗尾垂三星擺蕩光的皦所遇變於前頓覺所守易耽耽

道在樓磨天百餘尺毳幙重重圍光彩耀金碧氣濛翡翠
鎖香潤椒塗壁上有金貂兒銜冰驅熱疾罇俎快號呼淋
漓文錦濕長歌葉落柯笑擲千金壁四座自三春杏與人
間隔俯思心怒怒幾為吾民泣何此有二天天乎不余恤
孰能以此意沛我蒼生澤且息絲稅賦且弭兵戈役四海
一狐續家家趙衰日此意竟誰會歲月逾回遁黎亦莫休
止虺虺以颯颯黎亦莫齊止曠曠愈不息何日不鳴條黃
鳥鳴習五絃解吾愠薰芳來帝室

原古上元學士

麟死九鼎淪萬世無孔孟文字糠粃餘扶藉不絕聖伊昔

大觀季天王始失政中聲入哇淫吾道孰不競金源東北
來一洗河海淨斯文甚濫觴幾墜土梗橫吳楚割半天瘡
痍僅續命伊洛遽騫騰朱張立朝廷弘肆六藝學俾與日
月並中原有奇才詞賦方闢飭天門黃金榜赫耀動萬姓
君臣此為得父師此為令或者語詩文環視驚眙矇孰意
元化精不遂入昏瞑浚發自蔡党高步出遼魯墨浸天壤
深筆掃風雷勁絲綸帝載熙訓誥王言瑩諸公繼踵作互
執造化柄黃山與黃華雙鳳高踳躓清風玉樹鳴千古一
輝映有若閑閑公光彩壁月恒雲煙恣揮灑乾坤快歌詠
豐豐金聲鏗矯矯銀鈞硬楊馮李雷麻嶷嶷齊倡應五行

連麗天四海望而敬偉哉遺山老青雲動高興文林剗剗
棘翰府開蹊徑秋空玉琴張搏拊分雅鄭三問一曲歌忽
喚劉伶醒哀哀汴蔡亡六合為懸罄此老獨巍然聲價駭
羣聽振袂凌孤霞珠璧飛欬警人宗一代文天賦百年盛
紛紛夸毗子相撫為些言評自謂人勝天詎知天已定行行
野史成共為天下慶作噩建子月投我以照乘藟屋驚見
斗寒焰忽蟠亘經也生已晚弗及拜先正窮閭一東書十
載成墮甌學問苟有歸貧窶安足病今乃得滇渤間津有
龜鏡挈我登龍門綆我出虎穿搖搖風中旌茲始見依凭
緬思先世澤干今果無竟嗚呼世道喪歎語寒淚迸何時

倒銀漢與世開艷艷昂頭冠三山俯瞰旭日晟陸海闢文
源生民共涵泳

明月

明月不自照漫作地上雪不照蒼天心照我多顏色天下
一月明美人何相隔靈波許我浴好花許我折滂沱淚沾
血蹉跎望明月

黃華

有華春不開苦愛風雨相節有根風不栽有子霜不結華開
難及時華落難載色暎焉涕泗零桃李肯孤潔西風一萬
里搖蕩幽香歇

古意

行行重回首日落天風高
擊手黎歌正月曳屣吟
離騷何當御六龍醉蹴三山
鰲一劍絕坤維灝海無波濤

蒼玉軒

綠玉劍拔起翠龍飛紫煙
虛簷生爽氣六合涵幽妍
老露洗珠國秀月涵金天
蒼蒼茫大古意蕭颯長風前

中夜誦書有感

日月猶不死吾道曷其昏
天地猶不壞吾道曷隱淪
世我實相違贅蔓徒紛紛
有道復無鳳非時亦獲麟
為抱大人器願歸大人門
長劍空倚天安得靜風塵
黎糗一鼓腹布

禍還生春曠蕩五車書
恹恹一幅巾青錢買濁醪
置之老瓦盆一醉南山頽
載立元氣根

虛白庵

郭抱大素樸構庵萬物表
不礎亦不楹曠蕩含幽杳
中有無名公獨立何矯矯
神存一室固心死萬化了
下視人間世汗溷驚擾擾
客氣賈餘勇浩然還自小
紋錦裹血肉珠璣裝僂僂
金宮壓地軸玉觀飛雲杪
一朝等黃土閱世急飛鳥
何如此庵中振古一昏曉
白雲滿霜樹老月涵風篠
此色與此界昧者恒背遶
苟能反身觀捷徑明瞭瞭
無欲觀其妙有欲觀其微
即知此庵中眼界闊多少

義士

燕趙古多豪士其借交報仇排難解紛以義相許固其俗也丁巳春余入燕得義士人一焉曰晉古跌宕於搢紳間聲名籍甚故得其為人尤詳初以蚤失怙恃著道士服杖屨去家觀覽山川交識名右王內翰白樞判魏靖肅元遺山一時名流皆嘗為之先後尤喜周急援難凡孤弱頓躓莫能自致往往賴之以濟一日挈壺酒踵余門而求詩余素喜奇節士聞其槩梗尤有激于中焉乃為之賦詩

嶷嶷一義士能激壯士肝燕市忽相逢布褐春風寒謂余欲赴難白刃色無難義烈我克舉鴻毛輕泰山嗚呼世道喪私智忘厚顏狗苟復蠅營青天井中看自救亦不暇碌碌長辛酸為爾舉一盃萬古高風攀會與魯連子把臂觀海瀾

鶴媒

胎禽昂藏姿仙家有高躡堪與雪月精凋刻為毛骨金鼎百鍊丹結為頂中物清秋唳江臯圓吭振哀玉時逐無心雲開向天邊出弄月過赤城警露晞陽谷還聞綠綺琴翻翥舞終曲道人庭戶幽滿院苔痕綠春深步落花天寒倚脩竹每惡鷹鷂忍大笑鸞皇俗誰知數澤間甘為獵人畜

反藏媒翳機解發刀矢毒翮嫒舞仙裳着意親麋鹿左右
成掎角顧盼爭血肉有如欺世人長往謝奔逐木食還草
衣緘口復瞑目與世若相望白雲繞茅屋澹然似無心干
戈還滿腹當時王夷甫豈勝何平叔巖廊高一世危坐翻
地軸

鴈媒

雲衢眇飛鴻往來解隨陽序當夜有所次進朝有行翰海
天山西卯育歲為常八月秋風高雝雝共南翔水國足汙
洲江湖多稻梁晡霽帶殘蘆老岸青草長哀鳴洞庭月亂
點瀟湘霜太和開冰天北去顏容蒼信禽法天運斷不為

郝文忠公陵川文集卷之三

古詩

曲阜懷古

孔林

泰山元不頹求作聖人墓嶽麓南面馳岨岫勢蟠踞端門
血書飛梁木忽生蠹遂成覆夏屋三千各封樹脩竹與文
楷灌聳擁煙霧森森十里林鬱鬱九原路燕人遠來觀子
貢獨不去秦火卷土焚漢雨橫天注本根萬丈深枝葉四
海布斯民賴餘蔭顛沛來比附凡鳥寧敢巢儀鳳見乃屢
緬懷掩袂時重念絕筆句摩挲石麒麟可惜死不過

杏壇

天地一生意孔門儘春風喜聞夫子道歌詠各雍容當時
說春王元化開無窮杏壇仁義香不見花白紅庭中手植
檜霜幹參青空幾回比歲寒亦指徂徠松有席不暇暖木
鐸搖西東桓魋怒扶樹仗劍邀其窮回車殺鳴犢擇木視
飛鴻燕居都幾年一世如斷蓬誰知千萬世遂爲吾道宗
枝葉今尤多春來花更濃昨朝上丁罷醉殺守祠翁

顏巷

顏巷無顏徒荒煙亂榛梗奚復辨宗陋淒然想幽屏應卜
原思鄰不與端木竝曲肱儘餘樂閉戶祇退省自有正大

域直造高明境不遠獨得仁無欲乃能靜瓢飲忘萬鍾簞
食同五鼎乃令子慟哭天喪不敢請顏大未爲短跖壽豈
爲永不貳乃云命枉生特徵倖黃桑千年道尚有門前井
誰來洗心齋無人照止影西風散禽鳥老雨溷蛙黾

周廟

中城繚危基公宮盡禾黍惟餘文憲廟青松陰寒礎墼壇
冷香火誰復薦籩俎厥初蒼姬王世德繼湯禹一再幾遂
微管蔡基祿父公旦述聖事攝政輔幼主皇皇赫東征罔
罔顯西土下能開成康上能竝文武禮崇七年制樂備六
代舞更比夏商文不替羲軒古公薨葬畢郢廟食乃在魯

宛與大成鄰氣色成龍虎誰知曲阜城即是文章府

子思墓

王陵象尼山室皇擬天闕白石六十四方正相倚疊卿雲
繞龍隧脩竹生馬鬣前却三代祖宛與聖人列乃是子思
子道貫祖孫一顏天曾始傳心授相世及大學宏綱舉中
庸性理切浩氣有益軻六經復為七向微三大賢聖統幾
廢絕爾來一千年晦沒無人說韓李端緒開伊洛本根揭
萬古唐虞心日月光目睫不必揮金鎚拜墓即親炙

奎文閣

新宮拜小寢旋上奎文閣欄檻紫苔深簷傾青瓦落佇立

思聖人音容儼如昨臨深敢為高轉逸不可學闕里泰山
前洙泗墳林脚道德竝流峙鳶魚各飛躍靈光秋草沒泮
水清霜涸返照入顏巷無人有餘樂舉手捫天星絡繹光
閃爍何時五曜入晃朗壁府廓歸馬掃撓搶勝殘沉貫索
忽聞金石聲殷殷地中作青天有太陽莫漫螢火燭

遊靈巖寺

乙卯秋九月十九日登泰山二十二日下太平

頂遂遊靈巖寺

岱宗西北馳倒卷碧玉環嶽靈秘雄麗勢欲藏三山初從
谷口入兩崦爭竄顏漸疑下地底細路深屈盤仰視覺天

陔川文集卷之三
三
窄石井攢峯巒陸海沙劫開突兀仁王壇桐鯨吼西風棟
宇橫高寒石龍噴清泉洒落几案閒脩竹掃山色瑩綠穿
雲根丹鳳飢不來寂寞青琅玕上方在天上下視無塵寰
空霏鎖霜樹翠錦蒙朱殷西日回清輝輕金蒲煙鬢何時
脫世網掛席高盤桓靜境求初心滯慮驅萬端向晚蒼煙
合更欲窮躋攀路斷不得前矯首重一看

贈青社諸公

北風吹海氛雄鯨偃修鱗皇皇擇木鳥落日將安之清霜
摧豐林枯沙沒旱枝況復天地閉豈汝飛騰時嗷嗷復嗷
嗷途窮愈多岐寸心增鬱陶拊髀潛生悲蒼茫欲問津謾

使行人嗤賴有魯連子亦在東海湄舉手謝浮世共欲尋
安期扶搖三山巔笑傲雲濤低半夜開扶桑弄日騰清輝
伊昔孔子父亦欲居九夷世網儻可逃去去夫何疑

青州山行

薄遊東諸侯致敬多擁篲訖無安果木歲晏復反鞞飲馬
南洋橋摩玩米芾記蛟龍郁蟠拏劔戟磔芒刺酌別表海
亭激灑吸空翠霜風吹鴻鵠草野簇車騎日斜過雲門凌
跨方半醉垠嶠亂葉滑躑躅幾欲墜懸壘半過面絕澗黑
無地入險難遽止眩運不敢視層崖宿山家坐久猶膽悸
居民畏馬嘶游子喜犬吠汲遠終夜喧月斜人未睡柴關

見星稀枕石餘，
薛膩酒散身逾困。
飢透食有味，忽聞炒椒
巔虎去，失羸孳陰森。
木石怪慘冽，霜露氣黎明。
轉重崦呀互急幽，悶繚繞天一線。
陷日孤光細，嵌隙深且蒼。
白晝悲翹，魁過午纔得水飲。
漱解鞍憇，却是城西河山間。
更清駛彎環折，鱷腸詰曲亂之字。
跋步重踐涉深淺，頻揭厲林開。
見石田數項，牛角銳淳俗久深居。
見人但驚避，農婦帛纏頭。
應門聳高髻，破屋有村翁無言。
但流涕舉鞭為撫摩，俾說山中事。
都因七十堦，鹵莽各稱帝。實戶三百萬，食盡猶未弃。
白骨與山齊，查牙誰與瘞。幸得脫齒頰，瘡殘餘一臂。
年來立海州，遺唾更疲弊。邊郡增仇敵，深山無子弟。
聞此

不忍聞，愴怛復嘸噦。海岱稱東秦，山河號十二。峽口吞穆陵，渤澥卷無隸。初從霸國後，往往逞兇獗。號公死巖邑，恃制殆非計。祇為殘民區，每啓姦雄志。窟宅多龍蛇，桃源難避世。數日出脩阻，川途漸平易。雲稍見萊蕪，孤城隱霾曠。回視青萬疊，乾坤屹軒輕。穿出過徂徠，皆轉逾汶泗。泰山正面看，益見崇高勢。目中好全齊，蒯生莫兒戲。為告慕容超，勿謂燕得歲。

界牆雪

不用體物字昌州北
金人所築界牆也

陰風簸長嶺，坤倪忽軒豁。嶙峋生鐵雲，黯淡死灰潑。初來雜沙石，硬顆傾碎雹。旋轉迸玉屑，一噴勢愈惡。勁發萬弩

齊激去掣箭鑿委積皆重搭背左着點剝道緊不暇飛滾
滾互團拮蟠空凍相粘連締渾欲閣漫天都一片奚計席
與箔何處覓界墻人間無海嶽顧盼已數尺氣偃驚駭愕
慄慄寒作威稜稜痛如斫糲糊半垂面酸楚欲折脚我馬
不得前我僕指已落重繭頓覺輕透骨江紙薄挾纒殆兒
戲豐貂亦纖弱向晚耦陟黑陰雲肆號虓虛橫空怒潮頭壓
地塌天角平拉老鼠山倒卷鴛鴦灤刀架走柔然金鼓鏖
衛霍竟夜遽呼號乾坤碎磨錯車從谷口沒人在冰底罨
黎明迤相尋推阜各挑撥還聞頓足歌彎弓弧盡飲躍正好
射黃羊何須待消鑠長嘯蹴踏去天沙蕩寥廓聲繞霹靂

絃查牙競禽縛平地深虎奔更不用贈繳瀝血嚼紫肝流
嘶飲紅酪雪盛馬尤肥皇天助幽朔資賦不畏寒自得生
處樂可笑羸秦初更嘆金源末直將一抔土欲把萬里邊
隱墻日避冷手弄不龜藥救死恐未能奚暇更守捉况乃
天道北斗極重旋斡黑雪是長安飛洒過汴洛突兀無與
強萬古入陰壑爲告党家兒惟當守盟約君看銷金帳豈
是疆戎索

獲鹿新居哭元遺山

殘山遶荒城慘淡帶餘雪我來問新居欲語還哽噎搖搖
識風旌掩掩淚隱睫額地升中堂痛激肝膽裂鼻若閻闔

風幽冥忽穿徹空宇一東書不見文章伯愁馬喑不鳴老
僕頓欲絕嬌兒北面啼高弟展轉說有書未絕筆有傳未
卒業靈輶已西州壯心空北闕緬思從公遊灑汗飛五屑
振筆青雲開炳烺寒電掣鯨吹濤山回隼厲霜鋒斨蘊情
入軟語婉藹幽更切鶯啼柳陰深百轉春不歇方張大庭
樂誰意成永別徙倚板庭柯窻戶轉寥寥沉乾坤入凋喪衣
冠少顏色魂來暮山青魂去暮山黑城頭老畢逋底事悲
破月中腸元易感使我心欲折

登昊天寺寶嚴塔

旭日燒銅輪赤氣繞車轂平步登青天陸海一龍窟寶藏

沙劫開突兀翻地軸瑰竒入霄漢締構窮土木高穿翡翠
籠直到蓮心出錯落金鯨鱗蹭蹬木地腹致身知幾層

覺重錦束巧碎雕鏤心力盡撐拄骨合脊三天神倚疊萬

國佛丹青雜珠琲新若手未觸盤盤老風煙天門鎖寒玉

乾坤一柱旁日月互生沒六年五入燕空爲眼中物于今

始一登頓覺超凡俗曠宇凌高寒飄飄肆遐矚海卷碣石

回天壓陰山覆瀘漚一衣帶居庸險何足蒼蒼金臺雲青

青蘄立竹昔賢今不見悵望空注目下視極羽淵黃能尚

盤屈窟宅幾千祀潛姦富凶毒魑魅不能禦何人與驅逐

燕雲割山河神州疆理蹙稱臣又呼父萬古天王辱一登

還百憂慘淡意回復安得脫世網對此傾醞醑慷慨澆心
胃醉向天邊宿

贈劉茂之

昔歲余先子辟兵淇衛間以雨壞垣厭其腰股瀟絕
不知人者數日醫者以良劑飲之而愈甲寅夏故疾
復作號呼晝夜殆不能堪全真者劉茂之飲之以藥
便血數斗而愈丙辰夏得風疾而小便結塞十餘日
臍周左如覆盃狀醫者殫技莫之能瀹茂之視之曰
是針不能達藥不能及有一術可愈乃以手按摩自
章門至于氣海項之血溺并出出數斗乃愈先子生

平疾病者三而愈於茂之者二是先子數年之命茂
之延之也茂之滿城人名至臨嘗遇異人授之方技
而不自售遇有疾者哀其苦而閱其窮即爲治之無
不愈顛連無告者日塞其門而不憚也雖爲全真道
而喜交遊洒落通敏不滯於物胃次洞豁廓無梗礙
而其蘊蓄有非凡夫所能見者余嗜先子之事且嘉
茂之之爲人乃爲賦詩

道進物我化技進心手忘飄飄子劉子道技皆所長委世
欲長往顧瞻仍彷徨吾民吾同胞顛頓真可傷以道引汝
年以術藥汝瘍生死且肉骨下手開膏盲譬如庖丁牛游

刃不折芒舉目皆全人仁壽亟八荒惟天界先子兩厄皆
再康晏景回桑榆庭戶生輝光我欲借君術醫國還虞唐
彷徨張四維突兀宏三綱緬思何可得謾自摧肝腸山林
有高躅注目煙霏蒼何當把臂遊深探先天囊

隨州

山南楚甸坼漢東隨爲大盡日涉艱阻極力出險隘川途
落木杪忽覩天宇快長林偃秋色百雉露茫昧疑向遠水
曲隱映脩竹外捷去不得前橫亘斷崖礙煙深梅欲春石
亂水相帶飛鳥不知人投樹聲甚怪探騎隔岸言轉出西
城背火壕削紫土斬絕黑欲墜當時不受攻例與安陸潰

居人盡室去溼養儘一敗荒空二十年繁夥日蕪穢白堊
餘屋壁狐狸窟庭內穿窬棗枝曲倚柱巖桂壞誰種當道
棘亂長侵階菜奧室沒蒿萊何處覓粉黛濕氣雜土腥當
晝半暝晦相國來秉鉞下令急剪拜佇馬開天荒欲復太
平代勿謂少師侈今有季良在

石門

霜風赭諸山重崦黃榭映東南漢川盡萬疊複嶺亘甲士
斫前路呀轉崗坂競登天忽落井急注縹一徑翻身伏馬
鬣植立上石磴覆地露葉滑擗面樹枝迸斷木餘高盤蹶
步復拉脛楂竹磔青耳剝刺蹄血凝石梁僅尺許絕澗陟

色暝萬衆急相擠失脚如墮甑前抵雙石門扼塞兩窟位
不虞爲申警傳呼空谷應大洪宿重兵栲栳相矐矐木蘭
與白兆左控復前迎漢淮此要害敵人必來偵部伍各整
頓介冑聽將令遇敵毋妄動涉險更安靜如律以次發不
鼓氣益盛崎嶇得隙地稻塍土脊硬匍匐拔劍刃瀕洞下
泥穿回看半天乾却欲上危磴日斜布營壘煙起衆已定
反思中原好桑麻展平鏡沃衍少巖邑生民樂王政嚮熊
文王師南服始數乘後來爲霸國春秋每譏評一州七千
里蓋亦賴形勝六朝據上流踵武及朝廷吾欲問楚人于
今更幾姓

白兆山

旗尾拖澗雲鼓行斷橫谷敵人隔林望坐甲不敢出白兆
有居民煙蘿蔽喬木負擔來迎降馬首爭蒲伏爲聞不殺
令又復治安陸萬死乞餘生焦土覓舊屋老人翻白鬢南
望吞聲哭松楸却成林到此死亦足載說桃花嶼醉墨苔
蘚綠每於秋月下似有飛僊讀遽令巾其巔重爲賜米肉
偏裨好護送縱歸不令宿喜氣動江山迢遙肆遊矐安得
與李白雲牕對脩竹

雲夢

群山避鄢郢霜淨楚天遠秋色浮鴈背風水蘆花滿陂澤

通江湖口岸藏町曠橫匯淵數大散漫稻畦淺積煙晚翠
重老浪虛白卷乾坤入涵混魚龍深宛轉殘嶺土崖斷餘
浸黑壤軟平崗繚中洲濶甸負長坂勁竹密如篋綠粉封
紫筍忽向青楓末半出黃榭峴北人有圖畫却向此間展
選鋒一萬騎掣電鐵滿眼更不顧虜獲直向腹心剪昨去
今飲江埽道草盡偃何處仍三戶踐蹂殆不免荒莊自池
臺寒蔓相桂眉鵝鶴不知家悠悠忘還返注目浩無際馳
想首重俛何時結茅屋老吟寄殘喘濯纓謝漢父瞑臥汀
沙晚

青山磯市

渡江不殺降百姓皆按堵羊羅到武昌相望兩舍許井邑
聯亘長橫斜纏水滸青山一聚落中道勢幽阻通衢萬家
市巴商雜越旅背面千樞洲漢陽對鄂渚絕岸斷鰲立崩
濤高觜吐竹樹深且密石頂還戴土傑觀復傑出層楹瞰
金楚薄暮重登臨道者貌甚古開軒具盃酒江氣滿樽俎
萬里西風來飄然若輕舉

壓雲亭

重嶺繚郭峻高亭下臨鄂艘艘斷江流甲騎蹙城脚拒命
始進攻鐵匠長圍合顧已無頭陀徑欲推黃鶴謁王登巉
巖再拜瞻日角王氣壓江山曠朗天宇豁十月汗沾裳敷

奏初不覺詔賜金叵羅禮酒焉敢嚼絲綸重開喻滿面春
風着撫膺還自頌不負平生學須臾動金鉞猛士徹虎幄
龍起皆雲從青山萬馬落

黃鶴樓

江漢天西傾斷崖感寒雪石城踴高樓瞰臨勢縣絕雲夢
吞八九沅湘在眉睫層軒掩石鏡更欲壓大別千帆落山
巔萬檣擁舟楫中天卷晴嵐不與人世接縹緲多飛僊超
搖有遺跡前丘黃鶴來重與添顏色丹梯挿青空萬丈生
金碧聞說呂洞賓題詩滿新壁至今起香霧恠字人不識
仙語龍蛇亂醉墨江山濕有時橫長笛吹落漢陽月洞庭

與彭蠡一聲勿穿徹我方溷戎馬對面兵塵隔焉能載酒
上雲間覓僊客當年禿髮翁幾回喚李白不見征處士亦
爲重嗟惜高賢共長往矯矯不可得落日聽江聲西風冷
蕭索

渡江書所見

已未秋奉命宣撫江淮自鄧南入新野蹈宋北鄙渡
泌河及湖陽入于春陵陂塘聯絡畎澮縈屬村墟翁
翳荒空不可行佳木脩竹竒花異卉櫛比林莽間林
然有感於中而取野蓮荒竹秋桐野菊四者姑以寓
感焉

野蓮

陂塘渺煙蕪秋波淡浮空蕪葭雜芙蓉依稀見愁紅輕銷
露華涼亭亭倚西風金粉亦自香霞腴爲誰容無言恨最
深失偶情更濃搖搖似相招爲喜詩人逢翻思彼桃李反
在羅綺中復憶巖下蘭綠葉翳荒叢西子出苧羅原思老
蒿蓬萬物在生處莫謾仇天公

荒竹

荒竹遶廢宅高下隨女蘿新梢入林莽迸葉揚條柯玉骨
清且癯埋沒還奄阿病綠煙慘悽枯黃雨滂沱劒斷戟復
斬壯士空悲歌伊昔主家安森森氣相摩籟龍起雲雷干

地煙霄過幽香澹庭除靜陰延綺羅一自兵塵生人去斤
斧多寂寞秋不實飢鳳將柰何

秋桐

高秋江漢波卉木入搖落荒林擁孤桐蔓草重繞縛淒迷
氣日喪憔悴葉自脫黃凋晚風吹青裂飢鳥啄無時亦無
儔幢幢老陰薄儀鳳安所棲宮樹空寂寞謂汝無自傷植
根亦嬌弱豈能持風寒況乃失所託何時此焉居揚鋤剪
荒惡攜幼板庭柯遂我生聚樂

野菊

乾坤入消數萬物呈晚節秋晏菊始華荒叢翳林樾野迥

幽姿清崗斷寒艷接絲蟲青苞啼蜚抱枯葉灑露積玉
華層層擁金屑我欲摘以杯飲之濯中熱霜裁郁高標胡
與荒穢列嗟爾夷惠儔玉質難變滅不謂無人看便使幽
香歇安得老瓦盆坐對澆古月

郝文忠公陵川文集卷之三

郝文忠公陵川文集卷之四

古詩

渡江書事

朔龍蜚冰天瀚海開日月萬國入尺筮海外迄有截東南
天一隅區宇獨限越我鞭莫及腹我車莫通轍阻山還據
江梁遠極亘絕桓桓天策王建旆秉鈇鉞虜裏推深仁不
忍遽剪伐弘需縱俘囚下令明不殺威銳極晦蓄龐恩肆
霑洽彼乃執信使謂令旨所差微鄙閔偷劫本以禮義期
誰知重驕跋王乃振師徒揚旗禡太白東西兩距海百道
相綰結斡腹出大理上流下開達夔門勢扼吭通泰潛擣

陸川文集卷之四
一
脅萬里常山蛇首尾勁相接八月馬首南王氣快軒豁千
麾繞清霜萬蹄碎踏鐵高天四旁開厚地一道裂西風楚
山空射虎皆遯跡驥怒憑風嘶一噴飛亂葉羅狀覘江津
輕舟詰朝發清波乃舒徐大浪還安帖中流笑前人浮梁
與荻筏白魚入王舟瑞氣浮桂楫曾莫一矢遺諸軍報鱣
捷談笑過江東兵刃渾不血居民盡按堵王師有成法駐
軍武昌南威聲轟霹靂申令仍緩師天裏有餘恤彼昏還
犯順投袂安可及文物三百年衣冠本無敵誤國不知罪
虛文猶論列誣以敗爲功負以勝爲說欺君還毒民何以
救破滅右師滿湖湘左師溢巴峽江許連大屯淮南擁驍

甲當朝大冠我于今有何策外勝常以力內強惟以德乃
今并棄擲本技原自塞伊昔澶淵回信誓始寧謐貽謀燕
翼子海內日富實中平或生虞南北動疆場鄭公慷慨姿
開心見肝臆遼主亦爲動相視指天日竟無海上盟二帝
終失國後來秦大師始悟前王失尋盟息干戈好聘堅金
石百年享安榮而反加罪罰經術日窮竒國論甚迂闊賢
王本寬仁於彼欲存活而乃極擯蔑激怒爾何益嗚呼天
王統紀綱萬世一文物與禮樂百代更累積一朝遂塗地
吾民作何物厲階大江流天地限南北兵爭無時休血與
江水赤混一纒四家千年儘戈戟何當斷其流舟車到南

極

宿汝南道院

虛庭淡黃昏折梅見新月徙其為長吟幽香有時發枯葉
鳴衝風花間動殘雪悠然憶故山風塵信音絕矯首天一
方踈星鴈聲噓

浮山堰

斷磧呀石絕長亘青池池蜿蜒繚彊蛇鑿壘橫齒齒淮流
從天來撇捩過一矢氣怒猶不平直欲卷遺址蕭郎真耄
期見性不見理日暮乃倒行平地成洛水赤子生魚頭百
萬并一死雖無殺戮名亦與挺刃比麩牲及菜果小惠徒

自喜梁宗不血食餒鬼未報此候景登明堂降罰亦天使
哀哉無辜民朽骨在餘滓霖潦秋煙深煩冤掛踈蒂浙瀝
生悲風慘淡動遊子白圭壑鄰邦遺誚今未已水可亡人
國斯言厲階始為報移山人愚叟真愚耳

冬至後在儀真館賦詩以贈三伴使

突兀天壤間洞視及八軌區宇入割裂疆場更彼此闕怒
尋干戈禍亂無期已孰能着手援下石往往是予方閉關
居不忍安坐視復有弓旌招颯然為時起仁義一萬言麻
鞋見天子天道本好生天顏亦為喜乃曰哀吾民去殺兵
當弭今日踐阼初急務惟爾耳三人奉書行一信盈尺紙

詔下癘老泣春風動田里入境及淮壖肺臆即開披剝難
撤籬垣羅列倒瑚簋萬變惟惘赤一念無倖詭白虹晝貫
日清江秋見底行人不能行在所輒頌止一自入儀真改
館七牢羨坐使庖丁勞徒增魯連耻空庭重咨嗟闔室還
徒倚蹉跎兩朝事慘澹一江水堂上接玉帛何如四郊壘
萬衆七奔命何如一行李新陽復生意歲律已窮紀節候
中易感挺特入骹骹折梅愧皇華對酒生顛泚蒼生苟能
活志士豈惜死願借君懸河發我弦上矢天下本一氣南
北只一理處置一何難鴻毛扇糠粃中原帝高光遠可遼
金比君家祖宗法親仁載良史可令富鄭公樹立太平址

一若泰山安一若九卯累事幾或一失千載貽詬訾中間
樂禍徒沮遏逞姦宄以爲富貴鉉瞰鼎磨血齒高天無風
颺側佇羽翮俟激怒起兵端馮鋒肆蛇豕皇皇仁聖資比
復當謹始發言謾盈庭執咎誰敢爾是非在目前胡爲眩
紅紫政如道傍室牽制終誤己區區謾多議紙上何足恃
出門懼垂堂何嘗見邊鄙睽孤還自睽見鬼急張弛一斷
即遇雨群疑皆披靡天運屬安治何當合離化不能鷹脫
講還成肉在几盤殮寧忍食欲斷南八指

儀真館後園感春

深庭日清亮卉木欣東風冉冉蒼翠香過雨濕青紅天葩

陸川文集卷之四
擁纖妍膏沐誰爲容蛺蝶太放顛百匝遶幽叢自謂擅春色豈知吾汝同一夜落花深綠苔香錦重我來藉醉眠仰而聽遊蜂悠然發驚省桃李不如松

繁李夜逾白條楊先時青春深百草長靡蕪滿空庭生恨復喚愁况復聞啼鶯心事觸處傷有花還無情朝光紅露晞暮色紫煙晴新燕嘲春梁歸鴻眇雲聲何當理舟楫麗日清江亭

風花點白紵香露滴清晨幽樹靜益鮮虛庭寂無塵亂草縈階除蒼苔老餘春鳥鳴墮紅英軟軟着襟巾翠碧挂黃棠飛去誰家鄰陰森現畏景綽約逢花神回首碧雲重紛

紛擾天真

三月花更愁一雨香百和綠英堆狼籍紅蕾愁亦破冉冉物華暮紛紛蜂蝶過幽事關心深愁來籍草坐春去酒樽空尚有餘花墮世路足迤邐人生多坎軻徒倚眎殘柯吁嗟果何柰

幽蘭三伴使致蘭二本感而賦詩

春山好鳥鳴淑氣扇芳樾林深草野迥宵與人世絕倚蘭郁幽姿心馨香忘目悅蒼苔翳祇自全荆蒯甘與雜靜深反致寇輕風遠香發虞羅斷芳根逢諛李桃穴本非華堂姿象卉同寒摠不逢涓羅臣又失長沙客上官增青蠅鄭袖逞

顏色薰蕕臭自長
瀟灑煙霧質鳩來
偶相看慘淡初未識
却疑子羽寢三嗅
清香泣坐久忽目成
江雲滿窓白重吟
遶雙叢一花還一節
青金呀鳳嘴紫錦卷
鸞舌我欲紉以
佩愛重不忍折
呼兒課楚辭諷詠思
比德所貴香不淫時
至酷清烈所恨失
所來好玩及爾賊
何當煙雨深還山種
明月

橄欖南人謂之格覽

南菓足韻勝北人罕
爲奇銀盤獻青子
愛玩驚見之蓮房
飽出螭棗滑生下
枝翠粉苔埽新清
烈凝松脂齒牙噴
艱澁苦硬不可持
氣韻久始來靈根
淪天池洒然凌清
颺甘

露濡仙芝有如宿瘤
妻苦節真可期亦如
相韓休朕瘡天下
肥危辭邊逆耳終自
爲良規先難阻欲速
後得卒莫違默默心
語口此樂夫誰知始
覺衆菓俗橘奴復梨
兒海嶺瘴天黑異味
翻茶飴雨露存天真
颺霧不可滋島嶼出
乳泉造化亦若茲元
氣舌本甜酸苦歸涕
洩本來甘受和衆味
相假移居然復其源
僞妄焉能欺何當謝
世網兀坐忘脩然沃
肺肝看山坐支頤物
表有真味載歌采薇
詩

秋思

星麾重霜相露落
月窺弊裘久客心
日勿傷况乃逢暮
秋誰知

楚江邊即是窮海頭赤子解虎鬪先拚十二牛太阿授楚
柄濤塗竟拘囚昊天有肅殺未肯休戈矛書生本迂闊國
計無身謀俯仰但不愧萬事從悠悠

燕南二十年閉戶鑿混沌先天探首尾立志極悻憤衣帶
歲不解疆勉忘怠困落筆一萬字開卷即立論不知世代
遠但覺聖賢近學問期有用匡濟展底蘊徵車賁丘園蟄
窟驚一奮使行還尼止江邊坐孤悶

江聲萬馬來勢欲衝夜枕志士足多感坐起安得寢靜聽
風雨急透骨寒凜凜湖湘湊遠浸巴蜀動餘沔誰令限南
北凶怒欲相詆落落弭兵心于今成具錦薦玉期捧盤墮

甌如拾瀋樽中有瓊花明朝且轟飲

木葉墮積水西風白鴈來祇應破月底曾過黃金臺昔年
弭荆卿臺邊把酒盃落日督亢陂芥蒼秋雲開浩歌易水
寒晚山青崔嵬誰知坐江館兩見飛鴻回空庭日徙倚慘
淡生莓苔援溺先墮井計拙良可哀

弱冠燕市游許與皆豪英百匝紅錦圍酒海橫長鯨醉倚
薊丘竹長嘯秋風生有時按策坐談天復談兵劃破天心
胷四座一時傾今來閑重門但聽擊柝聲乾坤惡喧聒竟
歲喑不鳴何日九地雷決裂重一車轉

昔游東諸侯秋晚登泰山佇立太平頂超然出塵寰日觀

望吳越浩渺秋雲閒長風漾江海天末生微瀾今年坐舍
館江聲滿重關却如在幽陵脩阻不得看好花靜有色相
對婉且閑無由寫哀怨日遠歌幽蘭

儀真館後園海棠兩花于秋因爲小酌賦詩

二年海棠秋幽妍對寒索霜後輒載花枯株吐纖弱化工
爲詩人故令造物錯木落出奇芬風度亦不惡尖黃簇短
葉膩翠光欲鑠蹙縮包紅粟殷濃入深萼稀踈生意怯靜
麗尤綽約飛絲罨青蟲蠅蛸共聯絡深閨養春嬌霜華滿
珠箔賴得西風輕微薰小陰作盈盈出宮妝新寒翠綃薄
空庭自顏色含恨誰附着息亡楚無言意婉心不樂琵琶

怨昭陽所遇非所託獨有未歸人相看慰孤酌却似海南
時坡仙政漂泊有酒仍有花世事且高閣後時亦何遲適
寓今猶昨香霧霑新橙傾酒兩螯嚼銀燭更高燒秋花易
零落

甲子歲後園秋色四首

鷄冠

夷則播新律卉木協秋候綰結流火餘的皪金天宿我
烈庭除摘摘儼雄秀炎帝朝火官絳幘軒宇宙植立竟不
拜離披擁青袖奕葉初類莧吐心漸如豆脉絡引絲起一
片珊瑚度雲芝茁紅腹紫茵卷翠脰碎顆蹙丹砂肉綻殷

血透怒割赤龍耳勁磔還亂糝麻葉薄且聳山字缺乃覆
查牙欲成角擁腫下連味生全餘小穗展盡帶殘皴昂藏
偃膺高突兀出群駮還將早霞映欲向朝日雖月露終夜
棲風雨幾回闔再礪復自止交退誰與救區區閑草花象
物與接構弭兵日觀戰亦是自貽咎垂簾且相忘高枕卧
清晝

牽牛

野花照天星，中花亦盛長。夏蔓草深疎籬掩斜徑幽庭
日無事森寂澹相映繚繞絲亂垂點綴葉相竝金風一披
拂零露光彩競參差碧玉簪綰挿滑欲迸霜絲吐冰同容

色好娟淨堂陰青錦張牆背紫苔瑩時方鵲橋成佳節當
秋孟織女能剪裁天河洗尤稱女以秋為期郎將花作證
風雨開雲屏鸞鳳鏘月鏡處乞巧造家家喜相慶五年
江館客萬事成墮甌不能致龍節空自悲虎奔永日鑿炎
蒸中暑甘卧病對花淚盈目坐起不覺暝雲漢見雙星回
頭看斗柄遙憐小兒女昏嫁俱未竟中流虞風波相見何
日更

葡萄

深院荒草長短蔓裂塼縫葡萄本西果南國誰與種插蘆
為扶持灌溉甚珍重瘦骨紫節舒龍頭青線控蟠上踈

籬清清將遠縱遭遇雖後時取實望秋仲摘露添俎豆庶
間館人供誰知六月旱卉木焦死衆斷秧餘幾花強勉着
土擁竟作纏結枯日遠空悼痛肺渴口重乾望梅心欲烘
忽憶河隴秋滿地無歇空支離半空架串州十里洞拇乳
積城岸頽癭接梁棟一派瑪瑙漿傾注百千甕徃歲見沙
陀回鶻正來貢詔賜琥珀心雪盛瓶盡凍查牙飲流漸氣
駭黑馬漣一旦離魏闕五載猶在宋見此復何時鳥道日
逆送

野蓼

窈池蓮蒲短久旱餘淺淤牆隈積餘埃玉鳳秋不翥野蓼

根莖堅幸得侵沮如節葉瘦且赤縻蕪交翠箸細蕊亦鮮
潔粉末糝丹素獨窳裊輕穗離披滴清露水花澹晚色幽
杳足負趣忽憶過夢澤千里渺煙樹蘆花與蓼花露錦蕩
雪絮深入芙蓉數遠映蒹葭渡舉鞭問飛鴻駐馬嚼佳句
乃今四壁中浩渺隔煙霧日斜對幽叢聊以慰遲暮大似
辛苦蟲無復風標鷺來因援沉溺底事極幽錮屢上剗腸
書無地瀝血訴嗟嗟好花草焉用生此處祇應為詩人故
故獨不去嘗瞻如啖蔗食蓼猶饒御伸首但有天志節久
愈著

新館秋懷贈正甫書狀

桂香動幽人秋草滿高牆
縞袂臨西風佇立歸興長
羈翼塌卑枝冥鴻恣翱翔
南山豈能移愚叟不自量
嗟爾遠慈顏從余使炎方
亦欲登雲衢逸足馳康莊
誰知成阻脩按劔看夜光
遂生肘腋變臬獍爲禍殃
顧微仁者勇臨難志力疆
縷縷百折餘奮義肝膽張
吾徒其能人玉石焚崑岡
所幸書幣完吉在身不亡
老雨洗新屋情話對空床
從渠讒口壓具錦生鋒鏗
誣善祇自欺謗毀痛何傷
昨宵燈火新月落霜露涼
載續所著書靜默窺天藏
槁茗煮黑水數椀澆枯腸
楚騷不必歌仰卧看屋梁
行止有天運得失理亦常
道能全始終終得拜當堂

烈士吟贈總領宋瑒

薄俗敗風節有志亦中改
舉世遂無耻逐利甘鄙猥
或有申張愆難免市道買
幾回惜魯連重爲嘆朱亥
襟期何灑落高義冠千載
聊復誰繼碌碌等駑駘
南北久拏兵吾徒着手解救
闔乃搏搯陷甕生蟲豸歲
久忽竊發亂刃期俎醢烈士
有宋君王事賴不壞賊中
偶拘隔凜凜畏英采慨然
自拔出喜聞官長在館吏
誘令降不語首重擺中宵
出儀貞五鼓入淮海羈留
故箝逼難耐異自悔睨柱
欲碎首守者盡惶駭大官
遠稱謝不拜貌磊磊遂陳
稽遲故勸令更延待方說
在諒陰便對有家宰彼知
辭理屈我乃意

氣倍顧聆立功名足以起庸怠君當持此心吾亦重自罪
春風波長江佇看振旅凱請鉞雪主辱為國清大慙

新館八月三日雨

氛稜積穢沴旁魄宇宙滿驕陽鏢洪爐豎電繞新館輪困
頽雲擁決驟白雨建迅雷初喑鳴缺列衣蟠空遠猛風忽着
人潑目氣即偃光恠入肝膈勢若山壓卵柱天金塔碎奮
地火旗卷連閃復疊擊黑海共旋轉群龍破壁飛驚馬浪拍
戶剪大舟千斛翻空車萬乘碾夜久怒益甚惴惴懼難免
童僕儘顛頓覆面不敢喘床第等階祀無復辨深淺記異
古未有大變見亦鮮祗應和龍氣突兀揭幽顯都將生靈

恨六合忿一闡蠢爾禍國徒聞此無愧覩

新館春日書懷

天未聞春鴻梅梢見新月孤影獨徘徊踏破牆陰雪寂寞
未歸人慘澹無家節異域機穿深中原信音絕白壁一片
心青天竟難說誰將萬古恨總付江城客

歲華雖云改突兀祗此心弱質乃重負第恐力不任走馬
活斯人覆舟成陸沉鑿牢耗將竭變故日益深東風吹江
聲曉日晞鳴禽從今桃李花又是夸園林

鵲領下空庭飛鳴行且搖飲啄還相呼去去仍相招我有
弟與妹江山鬱迢遙膝上讀書時中堂拜母朝頗離遠竹

陝川文集卷之四 十二
花翡翠巢蘭若衝風吹雲衢兩處聲嗷嗷

二親連夜夢慘戚異平日祇應節序改思子不忍食覺來
淚滿枕肝裂刀斧劈蕪紙死灰飛酌酒霜階濕遙想墳前
土歲久深荆棘忠孝兩未盡愧恨空飲泣

怨入江流深恨與春潮上天涯獨昂藏顧眄空俯仰誰知
誤國徒解結漫天網不漏一民命赤子驚攘攘徒薪重獲
戾擲杆乃加賞笑殺伍子胥黃池尚爭長

舉盃對江梅酒面生春香一酌酌上玄再酌澆新陽自勸
未歸人一詠復一觴中原帝仁君突兀恢皇綱緬思好生
心此去不可量自昔有天道我本無愁腸

丁卯孟春新館望南極

八年坐江館祇得片天仰厄運運迤邐乖氣纏魍魎白虹
貫黑日彗孛掃穹壤神風忽吹出新屋眼界廣前秋老雨
餘霽色開莽蒼參足玉井東云地都幾丈頰星隱江氣焰
焰光欲長老人慰羈孤驚喜意惚恍都疑夢寐中怪事非
所想誰知今年春更比往歲朗黃閏對天狼數日見乃兩
恨無雙白壁薦幣展觀享中庭望不盡謾爲拜稽顙南海
還無波北辰氣尤敞中原帝聖君太平今有象整頓高世
策道泰非技癢

郝文忠公陵川文集卷之四

郝文忠公陵川文集卷之五
古詩

幽思

江山鬱幽思靜止有天光
宛然褰薄帷明月照我床
蟋蟀鳴孤根鴻鴈頽飛霜
怒怒動羈衷耿耿發清狂
有萬來無端百折縈回腸
晤言且伏枕一寐成兩忘

搔首視天宇幄幕四垂碧
道窮誰與言迥然生孤石
默默心語口冥區扣虛寂
老鶴翩然來聲帶江臯濕
偶與成唱和玉振動肝臆
感寓遂無窮疊疊參玄極

性天入無極窅窅觀化初
渾淪一活物極盡都無餘
乾坤

藏首尾坎離互根株擺粒屑磨齒出入軋戶樞遂生無量
人乃有萬卷書總萃成六經所以為吾儒

衆動劇藏蓋獨覺還發蒙揭焰開熒臺赤日凌青空宇宙
一部屋至明元無窮但見人物異誰知地天通君看九泉
下景曜皆燭龍昧者烏可言耳目真朦朧耳

有物與生俱混涵具萬象昭昭為吾天嗃嗃不可尚妙合
元化精屬底更無上澹然入虛明大惡滋意匠如何窮奇
徒冗靈肆豪彊胡不觀其生未死先自喪

天幾為身樞轉幹主性情靜定得其正焉用巧與營化窟
每雕鍛焜耀開萬靈偽妄相治陶螺羸為螟蛉反觀心地

初周匝惟一誠莫漫彊作為無本竟何成

吾身眇天地本倉一稊米洞達乘道蘊大易乃吾體胡為
生町畦祇自揭底裏戰心作蠻觸鬪物劇角抵竝行本無
悖用智私乃爾終令八尺軀瑣瑣同蝼蟻

爰念筭心者愈筭愈無數脫兔驚處女不知竟何處豈如
千歲日坐歆窮其故清風翛然來皓月皦然去太虛自澄
湛寂歷降霜露求體與追迹抱甕渾不悟

至神妙無方倏忽驚掣電歸藏豈無所至密周匝遍君子
慎不出與民亦同患念茲即在茲過化復乘變何須七處
徵非必八還見槌碎玉連環總是光明殿

風輪載水輪天地一虛舟歷世千萬年生滅祇幾漚大吹
推濤山組練翻神州有生當盡壤物類仍自稠漂泊往何
深推盪來亦周安得窮其原神區莽悠悠

化區一洪鑪萬化總消鏢誰知鎔冶際園範已附著倏忽
聚散間共是一蜩殼古今都無跡曠蕩歸冥漠易簡故不
弊悠久相盤薄若言天地壤大塊何處著

凡物皆抱一太極元有兩歟初無端倪乘化互消長何人
與安排妥帖自來往萬物儘銷沉山川空泱漭秋水雙笑
蓉玉鏡花俯仰並蒂復同根一種誰涵養

地中有晦明天體無晝夜人物互寢興擾擾爭傳舍形器

兩疣贅面目更假借化工急轉圜光景速代謝君子惟立
德乾乾擬泰華揭焉與化俱萬古常不化

誰將碧桃核種向虛空天偶然落地上經雲滿山川秋風
實離離到處桃花然太極禪兩儀萬物相繼傳堯老舜乃
攝伯禹不與賢父父復子子一家三千年

二乃極之儀三為易真數渾無一推背竟不失故步昨朝
遶屋行百匝誦佳句日暮碧雲重褰裳自闔戶夢裏遍天
下還向家中住偶音遂無窮總在相因處

太極易始圖先天乃心法重重自環中井井皆成八一從
孔益後此幾無人發誰知周與邵千載合符節精窮無餘

塵表裏儘通徹青天碧玉樓影壓秋江月
太虛道之蘊太極道之體象滋本太元氣母託太始維繫
復融液有萬皆本此總向此中生會向此中死誰作先天
囊顛倒不見底我欲包無窮滿貯本然理
賦予初無私稟受各分定渙汗出大號有物歸一令羣倫
或弗從是乃與天競爾貴非吾心爾富非吾性篤恭恒自
盡慥慥言與行窮通無加損靜俟乃安命
數有本然差參伍行鬼神乾坤互傾壓氣運潛屈伸遂生
無量物乃有不盡人脩短變則殊盛衰化相因向非冰雪
姿安得花柳春或歆一死生第恐理不純

元陽首庶物蒼蒼豈正色轉圓開化幾剛健乃天德伊人
體其全造命還立極往往欺以誣反復為戕賊還看仲尼
處亦是帝堯則乃謂吾不能自暴烏足責

屈平窮作問柳州怨為對蒼蒼都不聞自致誣罔罪不周
彊為住祀人謾憂墜無擊手復無罅居然誑茫昧君子惟脩
身屋漏極謹畏吾心即吾天炯炯不在外

道宰藏殺幾天斷運神武剝割與裁制乃為造物主躁欲
生內兵神竒入臭腐撐裂太元體鑽穴成苦窠漫合神農
藥枉費女媧補遂成血肉運萬世一刀姐
盈盈水中荷郁郁畹內蘭娜娜揚柳春挺挺松栢寒資度

與余同生意最可看內恕惟恐傷吁嗟懼凋殘如何被秦
人伐木仍赭山又有蹈之徒瀝血還膾肝

人生會有為事物各有義苟非吾所取千駟不一視我我
君子心磊磊丈夫志泰山輕鴻毛無復顧勢利悲哉患失
徒滿目惟富貴舐痔復嘗糞甘心同狗彘

道有本然分立世為大節抑抑卑高陳井井貴賤別昭布
作禮經巍我正人極有位當自守有門誰敢越維世為大
綱少紊王政缺端本必正名大哉春秋法

姿貌爭寢揚鬪體無好醜魂氣忽登殂骨肉歸一朽中心
足良好衆美集萬有不與死生俱能同天地久粲粲含笑

人皎皎當窓牖寧知賈大夫還有射雉手

丹砂雜青空珊瑚映瑤草瑩美絕雕飾物外天然寶元精
赤子心炯炯顏色好淨徹無點滓本真當自保光明天地

藏萬象跡如掃藹然一壺春遂古常不老

鄰里逆歌哭萬古一死生不知道之常擾擾競哀榮都為
利欲驅每被寵辱驚胸中忽成敗堂上生棘荆終朝飽則
已裁肉同藜藿十萬下箸難安用志慮盈

白楊纏悲風萬象總一丘前哭後還嗟相送何時休君看
華堂上幾人能自留為善已無及顧盼驚螭螭如何貪生
人作孽謀阻脩腐敗不可埋遺臭徒千秋

形氣有盛衰魂魄共彊弱志師彊心田天地相旁薄苟爲
物欲屈消沮不復作精成百鍊鏡躍馬能矍鑠伯有死猶
見陰燐雨中着莫讀無鬼論神全鬼自却

高山洩雲峯陸物水必具野草茁獸毛林葉開鳥羽剛柔
乘萬變天地一逆數形色每相因具宰解陶鑄一受不復
易奸蚩總天賦更教影問形陶老端慕顧

嘗觀西伯易兩兩皆反對初從消內長却向進中退止是
一乾坤倍蓰生萬類如何區中人失計即憤憤吉凶互乘
除否泰相嚮背富貴爾歆榮貧賤彼何罪
重險入坎窞心術乃凌跨靈田初坦平底處藏誦詐都因

已弗盡牙角潛締加節節生城府岌岌深罟獲厭然欺一
世巖阻無隙罅誰知方寸間乃解坑天下

見適當慮遠知前必念後勿謂苟且已天地甚長久雖遮
一人目難塞萬世口輪困南箕舌轉幹北辰斗木林列甚可
畏洋洋在左右克已與不欺此語宜重守
市賈爭錐刀喘汗忘昏曉夸毗角名場提踵中忿擾復有
欺世徒每患機穽小易陽反為陰揭本都在妙儘為偽妄
役至死心不了焉知無事人獨立萬物表

大鵬歆南運北溟待天風龍神九地潛雲氣會相從有形
皆受制無體方獨通超然謝世塵杳杳遺孤蹤化冥復神

俱進退何雍容掌握起消息孰能為樊籠

天地無棄物聖人無棄人大澤生龍蛇原田長荆榛載質
邊出疆遑遑告時君有教不擇類善誘皆循循濟衆已所
任謀道豈謀身至哉擊磬心中有堯舜仁

飲水澹無味顏氏何所樂陋巷并日食至今見蕭索當時
一瓢中總是天人學無悔不違仁造道乃獨覺義理泰山
重富貴秋雲薄畏匡不敢死襟度何落落

通達有大鼎能函十二牛內可膳千夫外足鎮九州蒙童
抱東薪短焰如鬼幽勺水竟不熱評罵增怒尤力到功自
成適遠匪坐謀未行恐有聞千載一仲由

乾坤廓奧區衆動自紛擾萬世一寒暑往來幾昏曉茲生
顧指間倏忽急飛鳥大人車輪目獨見明瞭瞭歛藏入化
宇變出造化表道德高無極教化今未了

一理初不殊萬化各所之室中本無車門外元多岐君子
盡在我我盡夫何疑可行吾即行斯乃聖之時屢空仍自
樂途窮安足悲為告處世人勿為世塵斯

開春桃李花川原發艷陽盡室出綺羅嫵婉銜盃觴太和
暢天地書景方舒長一旦鴟鳥鳴霜露凋衆芳短目頽崦
嵒塞向皆閉藏君子法天運行止亦其常

鸞白玉翥丹霜尺鷃搶枯株知止各翱翔卑高一何殊精衛

苦填海冤憤一何愚
鴟鳩不為巢亦自有
所居偉哉衡門士
高卧一束書曲肱有
餘樂不用長者車

死生由一陽靜陰存
大撲卓午見牆影旭
日昇海角熒熒火
燎原祇畏水澆潑區
區握苗徒強把混沌
鑿黃庭衣朱衣着意
皆假合寧知歇心地
自有長生藥

叔世王道缺斯人絕
其綱况復異教祛曹
昧皆發狂陋儒萬口
和追逐尤犇忙潤飾
借寇兵倒戈蠹天常
或者以邪攻出管復
入筐吾將抱六經鑿
室深山藏

悠悠窮原人極上不
及下作計入鬼窟有
物皆土且兩墮歸虛
無天地亦偽假終然
禍仁義舉世一野馬
與物都無

情刻忍恩遂寡至今慕
高遠誰是真識者

梁折入小成偽妄亂本
真為我亦為義兼愛同
為仁厥初毫釐差其禍
無父君向非大儒辯喪
心幾殺身誰知寂滅
術遂使無人倫巍然文
章伯詆斥一何勤

日出開心牕日入潛水
府寤寐不在吾晦顯竟
誰主宰籥一往來何處
有龍虎癡頑坐徹明夢
暗睡卓午矯揉徒自
勞謾使形神苦君看乘
化者徜徉樂終古

昨夢入高寒御風驟兩
鸞扶搖青羅界日下看
長安烈烈丹鼎紅紫焰
燒肺肝清晨餐玉屑半
夜登金壇茂陵一杯土
依舊在人間鼓掌為一
笑舉世皆面謾

夜窺古潭月洞徹天心心澠朗色界異焜耀皆黃金旁有
蔚藍叢上有丹桂林倒影下無極湛墜入幽深衝風颯然
至波蕩不可尋始知人間世有動皆陸沉

隱几罷心官塌焉偶皆喪忽在無生前宵處太古上頃之
開內目百骸洞五臟知覺猶有滯尚未都無妄遂加存養
功玉宇森萬象造化皆由吾乃見鬼神狀

濯纓厭世塵入海求夜光具闕涵珠宮異色森綺芒采
滿懷袖駕龍登扶桑赤烏驚上天火曜舒乾陽回視乃瓦
礫自愧空莽忙書生莫謾愚弊帚安足藏

聖域每反觀洞達萬物情知盡理自窮祇是本然明恢廓

無滯淫靜止不將迎脩然坐乘化皓月滿中庭忽聞鴻鴈
來偶聽風水聲秉燭入暗室驚落東牕螢

有物莫不由萬古長安道區區往來者總向塵中老年年
雨灑清日日風驅掃行人竟無迹涸轍生秋草我欲謝帝
閣離居事幽討束載無良辰幾回問蒼昊

一念游萬仞塊坐不盈尺片席凝塵埃顧盼竟充斥誰知
呼吸間即是一太極有鳥鳴牕踈唧唧和機織偶然作聲
聽出入幾自適但令無錯應萬類等喧寂

藏舟泰山巔偶值懷襄流忽從歸墟東直向西海頭洗日
復濯月光抱空中樓扶踈散青紅異氣纏九州忽焉閤寒

沙佇立令人愁明朝早潮來欲住不得留
興感思往事邈若不可及觀化推將來遽覺今為昔
本無異至理萬世一不朽惟事業天地共終畢前波復後
波日夜奔注急祇是眼前水源深遂無極
景晏念慮歇支頤坐看山起來復何為結佩紉幽蘭萬事
從悠悠不愧俯仰間舉枉謝塵世月落梅花殘深江總風
波天淡孤鳥閑氣數當閉物我亦方閉關
惟時屬屯蒙患難豈能免南北走孤蓬秋風任飄轉五年
一龕燈半世幾詩卷老吟調鬼神深造每懼淺久為造物
惡今日復洞闡無思重苦思甘心向連蹇

宓犧地中復唐虞天下泰三王當革命五伯極破壞孤秦
龍戰野塗地儘一敗既有昔時寅復到後來亥消長數相
因治亂更萬代無為我生初委順從運會

采杞

蕪城古道荒有杞雜荆棘西風結霜腴纍纍綴秋寔肥瑩
珊瑚珠朱殷明欵滴長條擁寒葉射日光的礫采采置傾
筐入手火齊濕歸來奉二親煮茗紅脂泣前秋入新館枯
枝倒懸壁冬初半青乳慘淡不忍摘忽憶采杞時樂事不
可得隻身對孤叢片影深暝色王事尚稽遲何日共子職

郝文忠公陵川文集卷之五

郝文忠公陵川文集卷之六

古詩

和陶詩序

賡載以來倡和尚矣然而魏晉迄唐和意而不和韻自宋
迄今和韻而不和意皆一時朋儔相與酬答未有追和古
人者也獨東坡先生遷謫嶺海盡和淵明詩既和其意復
和其韻追和之作自此始余自庚申年使宋館留儀貢至
辛未十二年矣每讀陶詩以自釋是歲因復和之得百餘
首三百篇之後至漢蘇李始為古詩逮建安諸子辭氣相
高潘陸顏謝鼓吹格力復加藻澤而古意衰矣陶淵明當

晉宋革命之際退歸田里浮沈杯酒而天資高邁思致清
逸任真委命與物無競故其詩跌宕於性情之表直與造
物者遊超然屬韻莊周一篇野而不俗澹而不枯華而不
飾放而不誕優游而不迫切委順而不怨對忠厚豈第直
出屈宋之上庶幾顏氏子之樂曾點之適無意於詩而獨
得古詩之正而古今莫及也顧予頑鈍鄙隘躑躅世網豈
能追還高風激揚清音亦出於無聊而爲之去國幾年見
似之者而喜況誦其詩讀其書寧無動于中乎前者唱喁
而後者和訛風非有異也皆自然爾又不知其孰倡孰和
也屬和既畢復書此於其端云

停雲

思歸也

停雲蔽日翳翳弗雨伊余懷傷自詒伊阻展轉拘幽莫或
念撫瞻望中原徙倚凝佇停雲悠悠蒸氛濛濛衝風入室
泓彼大江崩心震魄慨嘆此窻孰因孰極惟道是從服仁
佩義完節爲榮之死靡它寔余之情寤嘆弗寐攬衣宵征
載思子卿千載如生無媒取妻匪斧伐柯樂禍深仇焉能
爲和生民無辜遘凶旣多銷兵無期將柰之何

時運

安命也

時運代遷旣夕復朝我來幽都尼于江郊側佇風飈載翔
雲霄天澤弗流原田槁苗熱中熬熬孰沃孰濯密室陰陰

孰脊孰矚仰視俯察無愧則足知命何憂事天乃樂在昔
過魯風雩浴沂爰登岱宗曠然忘歸五夜觀日神光發輝
乃今坐井高蹤曷追太行之巔先人舊廬貞松鬱林中堂
歸如安得燕喜美酒滿壺否弗終傾壞運屬予

榮物

觀物也

榮木青青英華若茲氣至而滋人亦如之變陽化陰物各
有時無莫無適夫道一而翳翳榮木云云歸根多華早落
幾何生存大冶通達乾坤爲門深固有方封植倍敷升聚
退散載美載陋生基死涯信新屈舊大業弗藏萬有自富
造物忘物於焉有疚脩身事天莫敢失墜造次九思局脊

三畏學聖造聖希驥則驥純誠粹精遂入獨至

贈長沙公族祖

述東軒老人也經之六世祖受

學於明道先生至曾叔大父東軒老道益大傳之
先大父思而有作

世遠學傳道親族踈起宗大家罔不在初淵源益深歲月
聿徂慨我寤嘆載思躊躇於昭東軒棣華新堂心授口說
繡弓白璋習習和風冽冽清霜吾道有宗吾家有光一世
師儒雲從志同洪河北南太行西東瀦爲湖湘流爲淮江
六經百氏包羅旁通邈予小子亦聞格言激揚餘波瞻仰
故山宿草荒阡抱書潛然惠我後世伊余之先

酬丁柴桑 自警也

孰使而行孰尼而止排難兩朝奔命千里終豈能必爰契
厥始稽山濤江凱為一遊墮甌半途十年隱憂豈作咄咄
祇賦休休來之坎坎天命悠悠

答龐參軍

始予年十六讀書於保塞鐵佛寺

南堂不解衣帶坐徹明者五年感而思之為賦是

詩也

孤燈長明終夜誦書齋深凌高中心自娛載汲載薪不逞
寧居惟梗伊蓬託處聚廬以道為富以德為珍勤以脩身
孝以事親師心造聖不資於人靜境神會伊顏孔鄰窮年

揭揭日夕孜孜力探自得何樂如之作為文章暢為歌詩
聲滿天地無為無思渾沌復鑿太極再分警覺不寐怡然
懼忻軼起遠蹈馭風騎雲萬動皆寂博我以文一席五載
默以道鳴弓旌下招遂成飄零遠奉信函使于吳京故業
委地朔南失寧焯焯古佛依依北風深窻短檠時見夢中
孰令一身乃異初終祇繫其逢載飭厥躬

勸農

閔農也兵亂以來四民失業農病為甚

因讀淵明勸農之作感而賦此

植天務本實惟農民力田效勤含淳守真代食惟賢勸恤
相因耒耜之益始活斯人每每原田奕奕黍稷雨暘若時

具來播植惟是糶糶惟是稼穡倉庾惟盈斯人足食爰自
兵興魚涸處陸汙萊留畚澆散純穆浚肌刮骨狹偷塵逐
婦役弗蠶夫征弗宿共政蝟起紛更弗久飢腸曷充獨耕
無耦既空杼軸孰事畎畝流亡異土隕涕博手食衆農寡
安得不匱有年無種豐穰安冀盜賊羣起餒死並至曾是
司牧曾是無愧井地荒空毗俗頑鄙逐末逞偽無復率履
農爲匪民犯繩越軌本既凋傷政何由美

命子

感子也余生三十有五年舉四子而三

夫焉李曰阿壽生四年矣而余使宋十二年弗克
撫育感而有作

余家冀方遺風帝唐詩書是傳奕葉有光厥初受氏爰自
殷商由漢迄今載僨載昌金源之亡屯盈禍周百口九族
竟不首丘父獨抱子脫死橫流敢望子孫復始公侯嶽嶽
樹立自別豬龍治經立學生人之功鬼抉神搜天緘地封
坦坦正道明明高蹤瀚苗起宗暢根達柯乃嗣乃續庭充
府羅天不憖遺未阜而窳宛宛三穉遽委蟲沙曷敢充天
祗自咎德阿壽始孩弗子去國川途阻脩變故揆忒教之
誨之於焉可得不成乎終何誕乎始徒耀松楸謾驚閭里
有子無子命數定止未能無情與物悲喜旣已奪去慘之
弗及亦旣生存寧必成立不孝之罪聖人所急大禹荒度

亦聞呖泣物生不齊亦各有時天弗私爾勿勞爾思魚腹
子滿孰繁若茲螺贏類我孰其使而林回棄壁厲夜求火
不知其天祗解私我失惡乎否得惡乎可圻裂啄食屬離
是假孤館四鄰擾擾嬰孩一死一生朝去暮來胡肯不肯
胡才不才敬恭脩身曷云悲哉

歸鳥

寓感也

歸鳥翩翩集于深林飛雲遙遙反彼高岑瞻望弗及實勞
我心重門擊柝闕于幽陰歸鳥翩翩深林于飛飛雲遙遙
高岑是依嗟我征夫曷云還歸瞻彼北辰翰音弗遺翼翼
歸鳥翱翔徘徊曳曳飛雲巖谷是棲鼓瑟鼓琴云胡不諧

孰為知音伊余孔懷翼翼歸鳥棲干故條曳曳飛雲爵其
高標伊余南征輸平內交滔滔弗歸故山夢勞

形神影

形贈影

萬象生道區受形各有時運會迭往來寢揚成壞之妙合
我初凝爾亦即在茲隱見陰陽中幻化無了期寤寐一死
生寂然匪為思我勞為有此爾苦勿涕而請看聲與響相
隨復何疑大都本無有相贈徒費辭

影答形

靜陰乃道影範圍無巧拙大車轉通達轍迹豈能絕妍醜
君固有隨君非暮悅日月相代明豈能與君別思君不如

我君沒我不滅生死無加損得失豈內熱因物不遂物原
原靡衰竭君終復隨我茲時見優劣

神釋

出入生死間妙物不自著物物弗為物超然變新故二子
一醯雞羊負相冒附成壞不在已安用相告語元陽初化
時靜一是存處在在靡方所悠悠無定住陶老信達者得
失委命數全神乃遺形種秫修釀其一醉樂有餘陶然忘
毀譽醉夢曾弗辨町畦都削去既不將不迎亦何憂何懼
能逃世上名豈有身後慮

九日間居

憶九日登隗臺

高秋登隗臺悵然思樂生君臣灑落契千載穰榮名西風
菊花期日照黃金明青山遶故國白鴈遺燕聲佳時動幽
懷晏景催短齡浩歌正激烈樽酒時自傾故鼎反磨室六
雄競光榮督亢一寒蕪酒酣重傷情丈夫遇主知唾手成
功名

歸園田居六首

憶登封盧溪幽居唐盧鴻故

居在焉

童穉遊鹿豕野逸便深山幽居遠世塵顛顛義皇年盧溪
鬱巖阿繚壁涵清淵徵君始真隱種玉開石田幽人競卜
鄰聯落崎阻間竹木茅舍邊桑麻橘籬前三春牡丹雨十

月梅花煙廬溪故居有徵君祠祠前牡丹故云孤雲出遙岑頽
日下層巔性與萬化寂身同天地間一從入馬羈趨蹶寧
復然

區中戰羣倫兩馬復掉鞅樂哉山中人身世無忘想避世
如避仇納履遂長往耕鋤足衣食生聚羅穉長含淳遂天
真體胖心亦廣底事綺里李出山真鹵莽

雨餘山色淨霜降木葉稀南澗拾梨栗帶月吟風歸青青
路邊蘭細細侵裳衣飯飽晦亦足物我兩無違好山無俗
人林泉有真娛種秫足自釀高下開荒墟清溪浸古屋況
有高賢居綠竹掃山色竒木近千株鄰舍幾父老話言皆

純如相見即痛飲甕盎傾無餘酒酣藉月卧清興欲凌虛
云誰知此樂此樂世間無

携酒招野人共飲清溪曲蔬菽總狼藉一醉萬事足苔痕
入窪樽林影上碁局月出盃更深不須更秉燭歸去靜柴
扉酣卧日已旭

中天太少室青滿洛陽陌三十六芙蓉舍此將安適嵐光
上晨曦秀色宜日夕攀躋景無窮養生地有隙不聞車馬
喧豈憚耕鋤役奔騰三十年樂事都敗績面目祇自憎俗
死竟何益

問來使

同前

朝拾澗底松空翠冷潑目暮歸東籬下自種今秋菊清泉
洗碎月襟裾有清復高卧幽夢長不覺黃梁熟

遊斜川

憶西郎

江孺坐白頭自分如歸休十年不出戶夢憶西郎游看花
當雷溪水合青山流泓澄潭洞豁容與浮輕鷗回抱道明
疰魏道王翅開林丘西郎翅見二峯如依依避秦人桃源關
田疇遺我山中酒殷勤更獻酬花飛好鳥歌塵世有此不
醉踏石上水灑然濯百憂何年結茅屋歸去便可求

示周掾祖謝

同前

勞生役世物萬戚無一欣且拂冠上塵暫作山中人尋春

洞林深賞晤元有因遠嶺絕水登鳴泉隔花聞幽趣方顧
接轉側志勛勤醉歸語山家今年當卜鄰便送買山錢結
茅東澗濱

諸人共遊周家墓柏下

淵明柏下飲相與樂吹彈何異燔間乞安足以爲懽總爲
付任適得酒即開顏自同墓中人未死心已殫

怨詩楚調示龐主簿鄧治中

萬化一大路去來皆茫然孰能不由行踵武億千年委順
出脩阻煩憂尼崎偏淵明苦避俗中歲歸田園門前柳生
肘更不入市塵自謂羲皇人恂然此窻眠日月自運會寒

暑從代遷達道久已化宛在伯玉前作詩本無怨高興浮
雲煙樽酒且逍遙銜盃稱世賢

答龐參軍

釋魏斌念母

嗟嗟勿念思諄諄聽吾言孰不敬事親燕安樂鄉園王事
有去留載讀陟岵篇大孝五十慕義止從古然白地內畧
獲賦予有厄緣悠悠無了期鬱鬱安得宣精衛豈填海愚
叟難移山天定自勝人還歸會有年

五月五日作和戴主簿

重午書懷贈書狀官

苟正甫

壞運窮天步行入當厄窮兀坐數年華大火復當中盛陽

正發育一氣方盈豐草木各暢茂郊園融凱風我獨少生
意東臂待一終燒醪點昌菹強飲心充冲江靜重門深兵
嚴四壁隆何日河陽縣闊步登平嵩正補孟州人治後
在是故云

連雨獨飲

新館久雨

悠悠孰主張尼此真偶然早歲喜學道自致雲霄間意欲
凌八表縹緲追飛仙折翼墮江國閉門悲漏天宛在厄會
中不自我後先乾坤清塗泥濡濕何時還異域歲月速轉
首十二年形神與化馳欲辨復無言

移居二首

吾道即吾廬仁義是安宅苟能庇風雨便可度朝夕雞川
十一遷歲有餅在役僦屋復分庭處處置床席往年始定
居生聚絕勝昔哭墓遷南來昆親忽崩析
城南初定遷高架插書詩基構計久常中表塗墍之幽窻
置棊几道妙儼若思訪問復安身作休日四時束帛賁門
閭推挽忽在茲進退已不詳天命豈吾欺

和劉柴桑

釋宋琚念母

骯髒宋仲儀倚楹獨躊躇念母望北雲悵然憶家居湯湯
伊祁水想見先人廬爲言我與子南來墮幽墟鄉園入渺
茫草木荒菑畬母氏倚門望無爲執勤劬生男不若女有

子還如無王事靡私監義別無親踈獄獄守一節乾乾斷
百須道在母即存志當金石如

酬劉柴桑

長風動江色俛仰星一周蕭然步空庭葉落淒其秋復命
不事操燕山一田疇我亦慕高節終能同此不憂心重鬱
陶安得駕言遊

和郭主簿二首

勉馬德璘孔進

周公待昧旦大禹惜寸陰聖學如弗及神道開靈襟嗟爾
氣質成變化更張琴力奪造化幾炳烺異昔今尊德始好
問卓出衆所欽去就審且精取予酌與斟繫風捕幽景扣

寂求至音講習說麗澤琢磨朋合簪踐形當自得好高勿
臨深

誠身乃事親行義貴全節清心不滯物月江夜澄徹味腴
須濟深窮理必詣絕天人一理貫曾次總羅列苟能一德
全即為萬世傑二子久事余旦旦提耳訣慎勿自弃指舍
此無歲月

於王撫軍坐送客

秋夕遣懷以下並同

鴈啼霜江清人與卉木腓舍館極羈留感秋尤思歸包胥
客咸陽孰為賦無衣美人期好合願言遂相違宛轉萬民
命怵惕終夜悲坐起對孤影斜月流寒暉悽風合酸辛道

然嘆稽遲天道本好生伊何獨予遺

與殷晉安別

昔游翰墨場渴日志尤勤遠探義農高近詣周孔親屬天
耿長焰豈惟照四鄰尸坐正冠裳暮夜達旦晨擬從太極
初再使乾坤分經世啓帝運立德開王春偶別燕山月忽
落吳江雲悵然負初心計拙良有因妄動希時榮何如安
賤貧撫膺祗自責安敢復尤人

贈羊長史

寥廓安得翔沮澤多羅虞蛩吟苦關心鴈足無來書憶昔
少年場結佩遊通都北嶺既再登楚山亦常踰樽酒生風

雲鞍馬走臺輿，轉復虎躍一世英豪。俱投奔誰使然，竒蹤日踟躕戶外，皆告絕跬步無所如。幽明澹窻，星夜氣深庭蕪，心折萬緒繁。遘閔思舊娛，紙上認堯舜，自笑幾何踈。起來月中行，滯鬱方一舒。

歲暮和張常侍

渴中夜，尤劇扣關汲新泉。快飲沃肺肝，四顧無與言。白髮照寒月，素影亦何繁。幽窻挽衣坐，反責思尤愆。胡不蹈東海，胡不餓西山。覩顏食不義，忍辱待生還。露氣淒且清，別恨相縈纏。殷憂有時窮，今夕是何年。歲月肯我與，精魄隨化遷。嗟哉胡不晨天乎，其偶然。

和胡西曹示顧賊曹

月出蔓草寒，江聲動清颼。窻戶漸撼撼，淒其飄我衣。孤鴻悲遙天，寥落片影微。蟋蟀不在堂，苦傍傷根葵。運數方厄窮，氣序亦頽衰。羈懷感尤深，中宵涕重揮。黃虞不可攀，周道何委遲。嘯歌和淵明，慨嘆有餘悲。

悲從弟仲德

銀沙滿玉河，界天清露零。孤心正耿耿，秋夜何冥冥。念我當屯凶，不如初無生。乃同不周折，遽向東南傾。御毒方弄兵，好會其能成。蕭蕭變齒髮，冉冉頽年齡。潮生夜江高，簷閒動松聲。心魄忽蕩搖，攬衣步中庭。幽蹤獨往來，慘淡關

山情未信天爲人更著影問形我本不欺人萬折氣益盈

始作鎮軍參軍經曲阿

青苔入室深蝸涎縈素書坐席凝陰塵形骸久塊如聲困
磔株木冥升躡天衢投膠止河濁自笑真迂踈羈魂重凌
兢枯腸謾縈紆一榻不復移轉首十年餘空期汗漫遊慨
想山澤居兀兀几上肉喁喁釜中魚有物皆恣睢而我獨
囚拘安得天池風吹上太行廬

庚子歲五月中從都還阻風於規林二首

逼窄片天月照我江濱居闇然六用絕孤影獨于于屋漏
重反觀面壁復向隅幽明無二道得喪歸一塗康莊馭軒

車豈能適江湖挾山以超海過計元自踈憂違付順適樂
地儘有餘天運誰能逃忿懷將何如

南 信命絕欲行將安之家人歌屨屐遊子無還期門前
大江橫潮來不違時日月相代遷我獨何在茲細和淵明
詩載歌歸來辭知命不必憂樂天復何疑

辛丑歲七月赴假還江陵夜行途中

茲心乃活物探賸還搜寔遂知天地幾洞見古今情樂禍
多下石復故誰班荆嗟嗟何不辰晉闇誤此生老樹棲驚
鳥江靜秋月明顧影無匹儔徒倚悵不平空庭步數周肅
肅成宵征河陽有賜田何日得歸耕自顧灑落姿而乃重

纏縈當處不可出誤我祇世名

癸卯歲始春懷古田舍二首

禍隆殺戮運民命殲蹂踐赤手與天爭跋扈其能免更深
不成眠反側懷念緬世路劇翻倒喜惡還病善擾擾人爲
多邈邈天道遠寒暑迭代遷潰亂胡不返自與鄉隣鬪嗟
我識慮淺

先君貽詩書繕性安賤貧每戒躁與速重勗敬以勤尤惡
名太早不許交時人守道業惟舊充誠德自新粟盡義不
渝闔門亦懽欣伊顏遽學步鄒魯頻問津友愛撫弟昆仁
賢是親鄰宛若故山家陶唐有遺民

乙巳歲三月爲建威參軍使都經錢溪 至日雪

夜窻密有聲庭阿遠深積誰知大江頭却似窮海昔鷓鴣
喑不鳴羈鴻斂雲翻乾坤一糶糊玉氣皓無隔嗟余雪國
來十年一行役體髮久已變茲心獨難易真宰豈仇子運
數會崩折途窮歲亦窮真標見松柏

還舊居 庭草

客居久爲家十載猶未歸蔓草上階除委碧生恨悲相看
辨時節夢寐荒是非昔時車馬多薙去一無遺今來斷行
跡愛玩常相依榮瘁兩暘中凋腐寒暑推露綠感春芳霜
黃怨秋衰藉步柔且佳關心涕長揮

戊申歲六月中遇火

萱

南風青鳳尾擁翳當庭軒金甃碧玉筵呀折如焚燔深叢
駐長夏次第開後前北堂昔養母家人欣聚圓對花舞班
衣暫出轍遽還懽顏每爲開太和回一天一從哭墓後去
國十二年年年見新花來日相對閒忘憂却生憂所賴志
義堅夕步拾落英丹粲滿芳田感創復臥思蒼茫不成眠
故叢誰翦移祇應滿西園

巳酉歲九月九日

黃葵

清標倚西風零亂七月交天宇始霽肅卉木方瘁凋停停
展嬌黃獨爾風度高金盃困側露綠筵嫩干霄倏然對仙

花頓覺忘憂勞開樽坐踈影渴飲劇沃焦折來挿愁鬢兀
醉從陶陶日上復盛開更須醉明朝

庚戌歲九月中於西田獲早稻

芙蓉

久客未還反殷憂徒多端對花復舉盃暫得心田安芙蓉
如美人盛容耐闕觀愁紅漬粉深醉臉傷春還上日嬌暈
滋依風翠綃寒含涕有深思欲言還羞難露重膏沐新低
重淚闌干無情似傷情使我凋朱顏載歌更獻酬物我何
相關起來拂花舞不復爲嗟嘆

丙辰歲八月中於下溪田舍獲

菊

霜菊有正色堆積深庭隈綠蘂粲金屑清香動幽懷願言

窮節士氣韻相與諧亦有玉華鳳豈無紫冠雞俗死委蔓
草繞叢日百迴屈子餐落英至今辭賦哀淵明折蒲把嘯
傲東離開余今手自種坐俟星火頽依風日吟哦天道孰
違乖最憐抱露蛩寒夜同幽棲

郝文忠公陵川文集卷之六

程